

Хүүхдийн номын ордон
Мөрөөдөл танхим



Данс: 7561 (bkmon) / 15446-3-1

Шифр: ББК 84.8(4Фр) / С.421



СЕНТ-ЭКЗЮПЕРИ

БЯЦХАН ХҮН ТАЦЖ



АНТУАН ДЕ СЕНТ-ЭКЗЮПЕРИ

БЯЦХАН ХУНТАЙЖ

“БНМАУ Ардын боловсролын яамны хэвлэл” Улаанбаатар хотноо
1972 онд эрхлэн хэвлүүлсэн номыг

Цогт охин тэнгэр сангийн захиалгаар Цагаан бамбарууш
хэвлэлийн газарт 2023 онд цахим хэлбэрт хөрвүүлэв.




ЦАХИМ НОМЫН САН: www.e-nom.mn

-

**

Уг номыг “Болор дуран” шалгуураар шүүсэн болно.
Программтай танилцах бол сурталчилгаа дээр товшиж холбоос руу
орно уу.



АНТУАН ДЕ СЕНТ-ЭКЗЮПЕРИ

(1900-1940)

Энэхүү туужийг бичигч, францын үргэлжилсэн үгийн нэрт зохиолч, нисгэгч [Антуан де Сент-Экзюпери](#) 1900 онд Лион хотод төржээ. Далайн цэргийн сургуульд суралцахын зэрэгцээгээр дүрслэх урлагийн сургуульд явж байжээ. Цэргийн алба хааж байхдаа 1921—1923 онд нисгэгч болжээ.

20-иод оны сүүлчээр Тулуз Дакарын хоорондох анхны нислэгт онгоцны багийн бүрэлдэхүүнд оролцон нисэж байв.

Сент-Экзюперийн амьдрал, уран бүтээл салшгүй холбоотой. Түүний бичсэн романууд: “Өмнөдийн шууданч” (1928—1929), “Шөнийн нислэг” (1931), “Хүмүүсийн гараг” (1939) бол өөрийнх нь туулж өнгөрүүлсэн амьдралын дуртгалууд билээ.

Гадаадад байхдаа “Бяцхан хунтайж”, “Дайны нисгэгч” зэрэг зохиолуудаа бичсэн бөгөөд “Дайны нисгэгч” нь 1942 оны 2 дугаар сард англиар, 11 дүгээр сард францаар хэвлэгдэн гарчээ. Фашистууд уг зохиолыг хориглож байв.

1943 оны 5 дугаар сард Алжирт очиж, тулалдаанд оролцон, хэд хэдэн удаа аюултай даалгавар биелүүлж байсан. 1944 оны 7 дугаар сарын 31-нд Корсик арлын хавьд даалгавар биелүүлж яваад амь үрэгджээ.

Сент-Экзюпери идэрхэн насандаа хорвоогийн мөнх бусыг үзсэн боловч түүний олон сайхан зохиолууд дэлхийн уншигчдын анхаарлыг татсаар байна.

Түүний бичсэн “Хүмүүсийн гараг” роман нь Францын академийн, романд олгодог дээд шагналыг 1939 онд хүртжээ.

Уншигч та бүхэнд толилуулж байгаа “Бяцхан хунтайж” хэмээх энэхүү тууж бол англи, герман, орос зэрэг олон үндэстний хэлээр орчуулагдан, хүүхэд багачуудын сонирхон уншдаг номын нэг билээ.

Уг туужид хүүхдийн сэтгэхүйн онцлогийг аятайхан гаргасан байдаг. Тухайлбал, энэ туужид: *Хэрэв та нар том хүмүүст хөх цэнхэр оройтой, цэцэг ирмэглүүлж тавьсан цонхтой, ягаан туйлын их сайхан байшин би үзлээ гэвэл, тэд энэ тухай дүрсэлж бодох гэхгүй. Тэдэнд, зуун мянган франкийн байшин байна гэж хэлэх хэрэгтэй. Тэгвэл тэд:*

Ямар сайхан юм бэ гэгцгээнэ гэж бичсэн байдаг.

Энэ тууж 27 жижиг хэсгээс бүрдэх бөгөөд хэсэг тус бүр амьдралын онцлогийг гаргадаг.

Орчуулагч Ц. Сүхбаатар

Antoine De Saint-Exupery

LE PETIT PRINCE

Франц хэлнээс орчуулсан [Ц. Сүхбаатар](#)

ЛЕОН ВЕРТЭД

Энэ номоо том хүнд зориулсан болохоор би хүүхдүүдээс уучлал гуйя. Намайг уучлах хамгийн чухал зүйл бол энэ том хүн ертөнц дээрх миний хамгийн сайн нөхөр. Бас тэр хүн ертөнцийн бүх юмыг, хүүхдэд зориулсан юмыг ч гэсэн ойлгож чаддаг. Гурав дахь уучлах зүйл бол тэр бээр өлсөж цанган, даарч хөрж францад амьдардаг. Тэр сайн нөхөрт минь сэтгэл тайтгаруулах зүйл хэрэгтэй. Хэрвээ миний дээрх уучлалтыг хангалтгүй гэж үзвэл, би энэ номоо урьд миний сайн нөхөр байсан нэгэн жаал хүүд зориулахыг хүсэж байна. Хүн болгон балчир бага насыг дайрч өнгөрдөг боловч түүнийгээ эргэн санадаг нь даанч цөөхөн. Тэгээд би энэ номоо том хүнд зориулснаа больж балчир байсан үеийн Леон Вертед гэж заслаа.

БЯЦХАН ХУНТАЙЖ

I

Би зургаан настай байхдаа “Амьдарсан түүх” гэдэг аглаг ойн тухай номоос гайхамшигт сайхан зураг үзэж билээ. Энэ бол аварга могой нэг араатныг залгиж байгаа зураг байсан юм. Зургийн хуулбар энэ.

Тэр номд өгүүлсэн нь: “Аварга могой олзоо зажлалгүй бүхлээр нь залгичхаад хөдөлж чадахгүй, хоолоо шингэтэл зургаан сар унтдаг”.

Би тэгээд аглаг ойд болсон адал явдлын тухай эргэцүүлэн бодож бодож, будгийн харандаагаа аван анхныхаа зургийг зурлаа. Миний зурсан зураг ийм болов.

Би өөрийнхөө бүтээлийг том хүмүүст үзүүлэн, миний зураг та нарыг айлгаагүй биз гэж асуухад:

“Малгайны юунаас нь айх юм бэ” гэлцэж билээ.

Миний зураг бол малгайны зураг биш. Харин аварга могой зааныг залгичхаад шингээж байгааг зурсан юм. Би тэгээд том хүмүүст ойлгуулахын тулд аварга могойн дотор нь заанаа зурлаа. Тэдэнд дандаа тайлбарлах хэрэгтэй байв. Миний зурсан хоёрдугаар зураг (зураг) ийм болов.

Аварга могойг гадна дотно талаас нь зурж суухын оронд газар зүй, түүх, тоо бодлого, хэлний зүйг сонирхон оролдохыг том хүмүүс надад зөвлөв. Ингээд би зургаан настайдаа зургийн сайхан мэргэжлээ орхисон юм. Миний 1, 2 дугаар зураг амжилтгүй болсон нь итгэлийг минь алдагдуулж билээ. Том хүмүүс юмыг өөрсдөө хэзээ ч ойлгодоггүй, хүүхдүүд бол томчуулд үргэлж тайлбарлаж өгөх нь хэчнээн залхуутай.

Ингэж би өөр мэргэжил сонгон, онгоцны нисгэгч болов. Би хорвоо дэлхийгээр бараг тойрон нислээ. Газар зүй үнэхээр надад их тус боллоо. Эхлээд харангуутаа л би Аризон болон Хятадыг ялгаж чаддаг. Шөнө төөрвөл, энэ нь маш тустай юм.

Би амьдралдаа олон аавын хүүтэй уулзаж учирч явна. Би томчуул дунд олон жил сууж, ойр дотно мэдэх боллоо. Тэглээ ч гэсэн тэдний тухай олигтой юм бодохгүй л хэвээр явлаа. Би, ухаалаг байрын, юм эргэцүүлэн боддог болов уу гэсэн хүндээ өөрийнхөө үргэлж хадгалж явдаг анхны зургаа үзүүлдэг юм. Би яг ойлгомжтой байгаа эсэхийг л мэдэхийг хүсэж байлаа. Гэтэл тэд

надад “энэ малгай байна” гэдэг. Тэгэхээр нь би аварга могой аглаг ой, оддын ч тухай тэдэнтэй юу ч ярилцдаггүй Би тэдэнд ойлгомжтой юмыг нь л авч ярьдаг. Би тэдэнтэй бриж¹ гольфоор² тоглох тухай, улс төрийн бодлого, зангиа мангианы тухай ярилцдаг. Ингэхлээр томчуул эрүүл ухаантай хүнтэй танилцсандаа сэтгэл хангалуун байдаг билээ.

II

6 жилийн өмнө Сахрын элсэн цөлд нисэж яваад осол тохиолдож ярилцах хүн амьтан ч үгүй, гав ганцаараа амьдарч байлаа. Онгоцны моторын ямар нэг юм хугарчээ. Механикч, зорчин явагч ч үгүй гав ганцаараа би энэ хэцүү засвар хийх хэрэгтэй болов. Энэ нь надад үхэх үү, сэхэх үү гэдэг асуудал байлаа. Надад байгаа ус долоо хоног л дөнгөх төдий байлаа.

Анхны орой, амьтан хүн оршин суудаг газраас алсын алсад элсэн цөлд унтав. Тэнгисийн дунд хөлөг онгоц сүйдээд салан дээр үлдчихсэнээс ч доор, би ганцаараа тусгаарлагдсан байж билээ. Та нар миний гэнэтийн тохиолдлыг дүрслээд үз дээ. Өглөө болоход хүүхдийн хөгжилтэй дуу намайг сэрээлээ. Тэр өгүүлрүүн:

— Хүн гуай... надад хонь зураад аль!

— Юу!

— Надад хонь зураад аль...

Би аянгад нэргүүлсэн юм шиг ухасхийгээд л бослоо. Нүдээ сайн арчлаа. Тэгээд намайг их л сүрхий ажиглан харж байгаа ер бусын бяцхан хүүг би үзэв. Ингээд нэлээд хожим, түүний шилдэг зургийг зурсан юм. Миний зураг, хүний дур татах нь жинхэнэ хүүхдээс бага байгаа нь мэдээжийн хэрэг. Энэ миний дутагдал биш ээ. Би аварга могойн хоёр зургаас өөр юу ч зураагүй бөгөөд, 6 настай байхад том хүмүүс, миний зураач болох хүслийг минь алдагдуулж билээ.

Энэ ер бусын хүүг сайтар ажиглан харлаа. Намайг амьтан, хүн оршин суудаг газраас алсын алсад байсныг битгий мартаарай. Энэ жаахан амьтанд маань төөрч, айж зовсон, өлсөж цангасны шинж ер үгүй. Түүнийг харахад алсын алсад амьтан хүн оршин суудаг газрын төөрчихсөн хүүхдийн шинж огтгүй байлаа. Би ярих зүрх орон, түүнд:

— За... чи энд юу хийж байгаа юм бэ? гэв.

Тэр дахиад л, нэг их чухал зүйл шиг, намуухнаар:

— Хүн гуай... надад хонь зураад аль... гэлээ.

Энэ нууц зүйл сэтгэл их хөдөлгөж, үгийг нь зөрж зүрхлэхгүй байлаа. Амьтан хүн оршин суудаг газраас алсын алсад байгаа болохоор үхэхээс болгоомжлон, өврөөсөө цаас үзгээ гаргав. Би газар зүй, түүх, тоо бодлого, хэлний зүй судалснаа дурсан, бяцхан хүүд (жаахан дурамжхан) зураг зурж чадахгүй гэж хэлэв. Тэр надад:

— Энэ хамаагүй. Надад хонь зураад аль гэв.

Би яаж хонь зурах вэ дээ. Би авьяастай байхдаа хоёр зураг зурснаас биш, өөр юу ч зураагүй. Би аварга могойг гаднаас нь зурсан зургийг дахин зурав. Бяцхан хүүгийн надад хариу хэлэхийг сонсоод их гайхлаа. Тэр өгүүлрүүн:

— Үгүй, үгүй! аварга могойн дотор байгаа заан надад хэрэггүй, Аварга могой их аюултай, заан лут том шүү дээ. Манайх жижигхэн л дээ. Надад хонь л хэрэгтэй. Надад хонь зураад аль Тэгээд би зурлаа.

Тэр нэлээд анхааралтай ажиглан байснаа:

— Үгүй! Энэ чинь их өвдөж зовсон хэтэрхий дорой амьтан болсон байна, Өөр хонь зураач гэв.

Би бас л өөр нэг хонь зурлаа.

Найз маань өрөвдөнгүй, дотносгоор инээн:

— Чи сайн хар даа... энэ чинь хонь биш, хуц болчхоод байна. Бас эвэртэй...

Би дахиад л зурлаа.

Тэр урьдах шигээ бас л голж:

— Энэ чинь дэндүү хөгшин болсон байна. Би удаан амьдрах хурга хүсэж байна шүү дээ гэв.

Тэгэхээр нь би тэссэнгүй, мотороо засахаар яарч байсан болохоор зурсан зургаа шидчихлээ.

Би түүнийг орхиж,

— Энэ хайрцаг. Энэ дотор чиний хүсэж байгаа хонь бий гэв. Хатуухан шүүгчийн маань царай гэв гэнэт засарч:

— Миний хүсэж байсан яг энэ! Энэ хурганд их өвс хэрэгтэй гэж бодож байна уу, чи?

— Яагаад?

— Учир нь манайх жижигхэн л дээ.

— Энэ үнэндээ хангалттай л даа. Би чамд бүр жижигхэн хонь зурж өглөө.

Тэр, зураг уруу толгойгоо бөхийлгөн:

— Тийм ч жижигхэн биш шүү энэ чинь... Хараач! Унтаж байна... ингэж би бяцхан хунтайжтай танилцсан юм.

III

Түүнийг хаанаас ирснийг тийм ч амархан мэдэж чадсангүй. Бяцхан хунтайж миний асуултыг огт дуулаагүй юм шиг өнгөрөөж өөдөөс олон юм шалгаж байлаа. Санамсаргүй ингэж хэлсэн үгнүүд нь аажим аажмаар намайг бүр сэрээлээ. Тэр миний онгоцыг хараад (би онгоцоо зурахгүй, энэ зураг надад дэндүү нарийн юм) надаас:

— Энэ юу юм бэ? гэж асуулаа.

— Зүгээр нэг юм биш. Энэ ниснэ. Энэ бол нисэх онгоц. Энэ миний онгоц. Би үүнийг эзэмшин нисдэг юм гэдгийг түүнд хэлж байхдаа омог бардам байлаа.

— Яалаа гэнэ ээ! Чи чинь тэнгэрээс унасан юм уу? гэж дуу алдав.

— Тийм, гэж би даруухан хэлэв.

— Хөө! энэ чинь ямар сонин юм бэ...

Бяцхан хунтайж тачигнатал их л сайхнаар инээхэд, миний уур хүрлээ. Надад тохиолдсон золгүй явдал хайхрамжгүй өнгөрөхөөргүй зүйл гэдгийг ойлгоосой гэж хүсэж байлаа. Тэр дараа нь

— Тэгээд чи тэнгэрээс ирсэн хэрэг үү! Чи ямар гарагаас ирэв? гэлээ. Энэ цөлд тохиолдсон хачин үзэгдлийн учир нэг олдох нь байна гэсэн бодол орж ирээд, түүнээс:

— Чи бас өөр гарагаас ирсэн үү? гэж би эрс асуув.

Тэр хариулсангүй. Алгуурхан толгойгоо дохилзуулан, миний онгоцыг харан харан:

— Үүн дээр чи ч лав их холоос ирж чадаагүй... гэв.

Тэр нэгэн зүйлийн мөрөөдөлд их удаан бодлогошров. Тэр өврөөсөө миний хонины зургийг гарган, ховор эрдэнийн зүйл мэтээр харан харан зогсоно. “Өөр гарагуудын тухай дутуу дулимаг юм мэдэн, гайхаж байгааг минь, та нар бодоод үз дээ. Би түүний тухай илүү сайн мэдэх гэж ингэж асуулаа.

— Бяцхан хүү минь хаанаас ирсэн бэ? Танайх хаана вэ? Миний хонийг хааш нь авч явах гэсэн юм бэ?

Тэр бодлогошрон, дуугүй байсны дараа:

— Чиний надад өгсөн хайрцагтай болсондоо би баясна. Энэ л шөнө орон гэр нь болно.

— Тэгэлгүй яах вэ. Хэрэв чи сайн хүн бол, би чамд түүнийг өдөр уяж байх уяа өгнө дөө. Бас гадас

Бяцхан хунтайж энэ саналд зэвүү нь хүрч:

— Түүнийг уяхаа? Яасан сайн хэрэг вэ!

— Хэрэв чи түүнийг уяхгүй бол тэр хаашаа ч хамаагүй явж алга болно доо...

Миний найз инээд алдан:

— Хаашаа явах вэ дээ!

— Хаашаа ч хамаагүй хандсан зүгтээ л явчихдаг юм чинь...

гэхэд минь,

Бяцхан хунтайж нэлээн сүрхий:

— Энэ хамаагүй, жижигхэн амьтан чинь холдоод юу базаах вэ дээ! Бяцхан хунтайж жаахан уйтгартай ярьж байгаа ч байж магад.

Тэр бас

— Санаа байвч хол явж чадахгүй ээ... гэж нэмэн хэлэв.

IV

Ийнхүү миний үзсэн маш чухал хоёр дахь зүйл бол бяцхан хунтайжийн гараг нь гэрээс яльгүйнхэн том байлаа.

Би үүнд их гайхсангүй. Дэлхий, Бархасбадь, Ангараг, Сугар зэрэг нэрлэгдсэн том гарагууд болон өсгөгч дуранд харагдах төдий байдаг өдий төдий жижиг гарагийг би сайн мэднэ л дээ. Одон орны судлаач тэдгээрийн нэгийг нээхээрээ нэр өгөлгүй, зөвхөн дугаар өгдөг. Жишээлбэл: “Гарагхан 3251” гэж нэрлэх мэт.

Бяцхан хунтайжийг, гарагхан В 612-оос ирсэн гэж би баттай бодов. Энэ гарагхан, 1909 онд нэг удаа туркийн одон орон судлаачийн өсгөгч дуранд харагдсан гэдэг.

Одон орон судлаачдын олон улсын хурал дээр энэ нээлтээ мэдэгдсэн аж. Гэвч тэр хүн турк хувцастайгаа байсан, хэн ч түүний үгийг тоож үзээгүй. Томчуул гэдэг ийм улс байдаг юм даа!

Европын хувцсаар заавал хувцаслах ёстой дарангуйлал туркийн ард түмэнд ноёрхож байсан нь гарагхан В 612-ын нээлтэд завшаантай юм болов. Нээлтээ дахин батлахаар 1920 онд одон орон судлаач их гоё хувцастай ирсэн аж. Энэ үед л бүх хүн түүнтэй санал нийлсэн сэн.

Би та нарт, гарагхан В 612-ын тухай ярьж, түүний дугаарыг баталж байгаа нь том хүмүүсээс л болж байгаа хэрэг. Том хүмүүс тоонд дуртай. Шинэ найзынхаа тухай та нар тэдэнд ярихад, онцгой юм та нараас шалгаахгүй. Тэд та нараас “Ямар дуутай вэ?”, “Ямар тоглоомоор тоглодог вэ? Эрвээхэй цуглуулдаг уу?” гэж асуухгүй. Тэд та нараас, “Хэдэн настай вэ? Хэдэн ах дүүтэй вэ? Жин нь ямар вэ? Эцэг нь ямар цалинтай вэ?” гэж л асууна. Заавал юмыг таних гэж боддог юм. Хэрэв та нар том хүмүүст: “Хөх оройтой, цэцэг ирмэглүүлэн тавьсан цонхтой, ягаан тоосгон их сайхан байшин би үзлээ” гэвэл тэд энэ тухай дүрсэлж бодох гэхгүй. Тэдэнд “Зуун мянган франкийн байшин байна” гэж хэлэх хэрэгтэй. Тэгвэл тэд: “Ямар сайхан юм бэ!” гэгцгээнэ.

Та нар тэдэнд: “Бяцхан хунтайжийг батлах гэж тэр их хөөрхөн, инээдэг, хонинд дуртай хэл дээ. Хонинд дуртай гэдэг нь баталгаа болж болох юм”. Тэд мөрөө хавчин, таныг “балчир байна аа!” гэнэ. Харин та нар тэдэнд “Түүний ирсэн гараг, гарагхан В 612” гэхэд чинь итгэцгээж, дахиад өөр юм асуухгүй болно доо.

Томчуул гэдэг тийм л улс даа.

Тэгээд уурсах хэрэггүй. Хүүхэд бол тэдэнд тун элэгсэг байвал зохино.

Тэгэлгүй яах вэ дээ, бид амьдрал гэдгийг чинь ойлгож байгаа болохоор бидэнд дугаар нь онц юм ер биш дээ! Би энэ түүхээ Шидэт үлгэрийн маягаар эхлэх хүсэлтэй. Миний хүсэж байгаагаар

“Эрт нэгэн цагт бяцхан хунтайж өөрөөсөө томгүй гараг дээр амьдарч байжээ. Нэг найз хэрэгтэй байж...” гэж эхэлмээр. Энэ амьдралыг мэддэг хүмүүст илүү үнэн зүйл болох юм.

Ийм болохоор, миний номыг хөнгөмсгөөр уншихад би дургүй байна. Энэ дуртгалаа ярихад надад уйтгартай л байна. Зургаан жилийн өмнө, миний найз хоньтойгоо яваад өгсөн юм. Түүнийгээ мартаггүйн тулд энд бичихийг хичээнгүйлнэ. Нэгэн нөхрөө мартана гэдэг гунигтай хэрэг. Хүн болгон найзтай байдаггүй. Би зөвхөн тоо л сонирхдог том хүмүүс шиг болж магадгүй. Тэгээд би багц усан будаг, өнгийн харандаа авлаа. Миний насанд дахин зураач болох хэцүү сэн. Би зургаан настайдаа аварга могойг хоёр янзаар зурснаасаа өөр юм огт зураагүй шүү дээ! Болбол их адилхан зурахыг хичээлгүй яах вэ. Хичээгээд хичээгээд нэг л болохгүй байх даа. Нэг зураг болохоор, нөгөөх нь огт адилгүй болчих юм. Би бас хэмжээг нь жаахан зөрүүлчхэж. Бяцхан Хунтайжаа маш том болгоод энд зурсан байна. Тэнд өчүүхэн л байсан сан. Хувцас хунарын өнгийг бас тааруулж чадмааргүй. Би тэгээд нэг л юм оролдлоо. Их чухал чухал хэмжээн дээр би алдана. Гэвч та бүхэн намайг зэмлэхгүй биз. Миний найз надад огт тайлбарлаагүй. Тэр намайг өөртэйгөө адил гэж санаа л даа. Харин харамсалтай нь, хайрцаг дотор байгаа хонио би ер үзээгүй. Би томчуултай жаахан төсөөтэй ч юм уу даа. Би ч лав өтөлж байгаа биз ээ.

V

Өдөр бүр түүний суудаг гарагийн тухай, гэрээ яаж орхиж аялсан тухай би ямар нэгэн юм мэдэж авах болов,

Янз бүрийн санал алгуурхнаар төрдөг болов. Ингэснээр гурав дахь хоног дээрээ хонины ачаар би заан модны үүсгэсэн эмгэнэлийн талаар олж мэдэв.

Энэ удаа, бяцхан хунтайж их л эргэлзэнгүйгээр гэв гэнэт надаас асуусан нь:

— Хонь бут иддэг нь үнэн юм уу?

— Тийм, үнэн шүү.

— Хөө! Яасан сайн юм бэ.

Хонь бут иддэг нь яагаад чухал болохыг би ер ойлгосонгүй. Бяцхан хунтайж дахиад л:

— Тэгвэл заан модыг бас иддэг байх даа? гэв.

Би бяцхан хунтайжид, заан мод бол бут сөөг биш, сүм дуган шиг нүсэр том бөгөөд зааны сүрэг авчирсан ч нэг заан модыг идэж барахгүй сэн гэж хэллээ. й

Сүрэг зааны тухай бяцхан хунтайж санаа авангаа хөхрөн.

Бие бие дээр нь тавьчих хэрэгтэй шүү дээ... гэв.

— Тэр ч тийм! Чи юунд хонь заан мод иддэг болгох гээд байгаа юм бэ?

Тэр надад: “Бодоод үз!” Тэгвэл тодорхой болно шүү гэж хариулав. Ганц энэ асуудлыг би ойлгох гэж тархи толгойгоо эргэтэл бодов.

Бяцхан хунтайжийн гараг дээр, бусад бүх гарагт байдаг шиг ашигтай, хортой ургамлууд ургадаг байх. Ингэхлээр ашигтай ургамал нь сайн үртэй, хортой ургамал нь муу үртэй байж таарна л даа. Харин ямар үр болох нь харагддаггүй. Ургаж цэцэглэлтлээ газрын хөрсөн дор нойрсонхон байдаг. Тэгээд наранд ээвэр талынх нь гэм хоргүй мөчир зулзагаа соёолуулж эхэлдэг. Улаан лууван буюу сарнайн мөчир зулзагаа дураар нь ургуулдаг. Хогийн муу ургамлыг танивал тастах хэрэгтэй. Бяцхан хунтайжийн гараг дээр аюултай үрүүд байсаар... энэ нь заан модны үрүүд байв. гарагийн хөрсөнд халдварласан аж. Заан модыг хэт оройтуулбал авна гэж бараг үгүй. Бүх л гарагийг бүрхдэг. Үндсээр нь авахгүй бол гарагийг нүхэлж гүйцдэг. Хэрэв өчүүхэн гараг дээр олон заан мод байвал хоромхон зуур тэр гарагийн хөрс шороог урвуулж хөрвүүлэн хэсэглэн үйрүүлчих шахдаг байна.

Нэг ийм хатуу журам байдаг гэж бяцхан хунтайж надад их л хожим хэлж билээ. Өглөө нүүр гараа угаасны дараа гарагаа хичээнгүйлэн цэвэрлэх хэрэгтэй. Навч нахиа нь дөнгөж цэцэглэж эхэлж байх үедээ сарнай болон заан модных тун адилхан бөгөөд түүнийг нь ялган танигдах болмогц модыг нь тастаж хаях хэрэгтэй. Энэ ажил их залхуутай боловч бас ч хэцүү биш.

Нэг өдөр бяцхан хунтайж, манайхны хүүхдүүдэд сайн ойлгуулах гэж сайхан зураг зурахыг надад зөвлөв. “Тэдний аялахад тус болох болно. Чамд өөр ажил байлаа ч гэсэн хойш тавиад хийхэд хор болохгүй. Харин заан модыг дураар нь ургуулбал аюул учирч болох юм. Би залхуу хүн амьдардаг нэгэн гарагийг мэднэ л дээ. Тэр гурван бутыг юман чинээ бодсонгүй...”

Бяцхан хунтайжийн заавраар энэ гараг ургамлыг би зурлаа. Би хүнээс сургамж авах тун дургүй. Гэвч заан модны аюулыг бага мэдвэл ямар нэгэн гарагхан дээр очоод төөрч магад учраас, энэ удаа хүнээс сургамж авлаа. Би “Хүүхдүүдээ! заан модноос болгоомжлоорой!” гэж хэлье. Над шиг түүнийг мэдэхгүй байж болохгүй. Эртнээс тохиолдож байсан аюулаас найз нөхдөө аврахын тулд энэ зургийг сайн ажигтун! Ийм учраас би цаг гарздахын тулд энэ зургийг зураагүй. Магадгүй, та нар: Энэ ном дотор яагаад заан модны зураг шиг, сүртэй том өөр зураг байхгүй байна? гэж асууж болох юм. Би оролдсон боловч амжилт олоогүй юм гэж хариулах нь маш хялбархан хэрэг. Би заан модыг сэтгэлийн их хөдөлгөөн гаргаж амьдруулан зурсан юм шүү.

VI

Бяцхан хунтайж чиний уйтгарт амьдралыг би яваандаа ойлгож эхэлсэн юм. Эртнээс нааш нар жаргахыг үзэх гэж их мөрөөдөж иржээ.

— Би, нар жаргаж байгааг харах их дуртай. Нар жаргахыг үзэцгээе.... гэж чи надад дөрөв дэх өдрийн өглөө хэлэхэд би чамайг жаргах наранд дуртай юм байна гэж ойлгосон.

— Харин хүлээх хэрэгтэй...

— Юу хүлээх юм бэ?

— Нар жаргахыг хүлээ!

Тэгэхэд чи их гайхаж байснаа өөрийгөө дооглож инээсэн Чи надад:

— Дандаа гэртээ байгаа юм шиг би загнадаг! гэж хэлсэн үнэн хэрэгтээ, Америкт үд болж байхад францад нар жаргаж байдгийг хүн бүхэн мэдэх билээ. Энэ нь францад ганцхан минутад очиж болдог сон бол нар жаргаж байхад нь очиж болох боломжтой юм. Харамсалтай нь франц дэндүү хол байдагт оршино. Харин чи жижигхэн гараг дээрээ байгаа бол сандлаа хэдэн алхам зоочоод ойртож болно доо. Тэгээд чи хүссэн цагтаа нар жаргахыг харж сууж чадна...

— Нэг өдөр, нар 43 удаа жаргахыг би үзсэн! гэж чи хэлээд Жаахан азнаж байснаа

— Чи мэдэх үү... уйтгартай л байвал нар яаж шингэхийг харахад таатай байдаг юм гэж билээ.

— Өдөрт 43 удаа нар шингэхийг харсан тэр өдөр үнэхээр уйтгартай байсан уу? гэж асуухад бяцхан хунтайж хариулсангүй.

VII

Тав дахь өдрөө, хонины ачаар, бяцхан хунтайжийн амьдралын нууцаас мэдэв. Чив чимээгүй бодож байсан бодлынх нь үр дүн шиг, элдэв болсон юм ярилгүй, шууд л надаас асууруун:

— Хонь, бут иддэг юм бол цэцэг бас иддэг биз дээ?

— Хонь дайралдсанаа иддэг юм

— Өргөстэй цэцгийг бас иддэг гэж үү?

— Тийм, өргөстэй цэцгийг ч иддэг.

— Тэгээд өргөс яадаг ч үгүй юм уу?

Тэрийг нь би мэдэхгүй юм. Би моторынхоо их нарийхан боолтыг өргүүлж гаргах гээд тун завгүй байлаа. Надад тохиолдсон гэмтэл маш их эвдрэл болсон шиг сэтгэл санааг зовоогоод, уух ус шавхагдаж байгаа маань бүр ч айлгана.

— Өргөс яадаг юм бэ?

Бяцхан хунтайж нэг асуусан юмаа шалгаагаад салдаггүй сэн, Би моторынхоо боолтод самгардан таамгаар л:

— Өргөс яадаг ч үгүй юм. Цэцгүүд өргөсөөр биеэ хамгаалах гэж гаргадаг.

— Пөөх!

Хэсэг дуугүй байснаа бухимдан:

— Би чамд итгэхгүй байна! Цэцэг гэм хоргүй байдаг. Ёстой л турьхан шүү. Цэцэг чадлынхаа хирээр эрэлхэг зоригийг агуулдаг. Тэд өргөстэй байвал бүхэн айна гэж бодоцгооно.

Би юу ч хариулсангүй, Энэ үед би: “Хэрэв энэ эрэг сугарахгүй бол алхаар цохиж гаргана даа” гэж бодож байлаа. Миний санаа бодолд бяцхан хунтайж саад болон:

— Хүүш, чи бодооч, цэцгүүд бол...

— Үгүй! үгүй! Би юу ч бодохгүй байна! Би санаандаа орсныг л чамд түрүүн хэлсэн. Би чухал юм хийгээд завгүй байхад!

Тэр намайг их л эгдүүцэн харж:

— Чухал юм аа гэв. Тоос шороонд хутгалдсан, гартаа алхтай, эрэмдэг зэрэмдэг юм шиг элдэв юманд эргэлзэж байх сан намайг тэр бээр нэгд нэггүй ширтэн:

— Том хүн шиг ярих юм аа чи! гэлээ.

Энэ нь намайг их ичээлээ. Тэр цааш нь хайр найргүй:

— Чи бүх юмыг хольж хутгаад... Чи бүр юу ч ойлгохоо болио шив гэж хэлэв.

Тэр үнэхээр уурлачхаж. Түүний алтан шар үс нь салхинд сэвэлзэн

— Хатангир Ноёнтон амьдардаг нэгэн гарагийг би мэднэ. Тэр хэзээ ч цэцэг үнэрлээгүй. Ганц ч од хараагүй. Хэнийг ч хайрлаж байгаагүй. Тооцооноос өөр юм юу ч хийж үзээгүй л дээ. Тэр чам шиг л бүх л өдөржингөө: “Би бол их сүрхий хүн! Би бол их сүрхий хүн!” гэж өгүүлэн, бардамнан хөөрнө. Энэ бол хүн биш мөөг л дөө.

— Нэг юу гэнэ ээ?

— Мөөг!

Бяцхан хунтайж уурласнаасаа болоод цонхийсон царай гаргав.

— Хэдэн сая жилийн өмнө цэцэг өргөстэй болжээ. Хэдэн сая жилийн өмнө хонь мөн л ийм цэцгийг идэж байжээ. Хэрвээ өргөс ямар ч ашиггүй юм бол цэцгүүд түүнийг ургуулах гэж юунд зовно вэ? Энэ нь нэгэн том улаан Ноёнтны тооцооноос илүү чухал, ноцтой биш гэж үү? Чухам юу хийж байгаагаа мэдэхгүйгээр хурга ганц дайраад л идчих, манай гарагаас өөр хаана ч байдаггүй, ийм цэцгийг би мэддэг бол энэ чухал биш үү!

Бяцхан хүү жаахан улайснаа дахиад л:

— Хэрэв хүн сая сая оддын нэгийг л төлөөлж чадах, тийм цэцэгт дуртай бол энэ нь тэднийг харахад оногдсон аз заяагаараа сэтгэх чинь тэнүүн байсан биз. Тэр: "Миний цэцэг бол нэгтээ л байгаа..." гэв. Харин хонь цэцгийг идвэл, тэр нь түүнд гэв гэнэт бүх од л унтарсан шиг болно! Энэ чухал биш үү!

Бяцхан хүү өөр юм хэлж чадсангүй. Гэнэт мэгшин уйлав. Шөнө болж байлаа. Би багажаа унагаачхав. Үхлийг амныхаа цангааг ч эрэг шургаа ч, алхаа ч ер анхаарахаа болив. Тэнгэрийн нэгэн одон дээр, өөрөөр хэлбэл Дэлхий нэртэй миний гараг дээр бяцхан хунтайж уйлан байв. Түүнийг тайтгаруулах хэцүү байлаа. Би түүнийг тэвэрч авч бүүвэйлэв. Би түүнд “Чиний дуртай цэцэг аюулгүй байна...Хонинд чинь хошуувч зурна.... Би чамд цэцгийг чинь хамгаалах юм зурж өгнө.... Би...” гэж хэлэв. Би өөр юу гэж хэлэхээ мэдэхгүй байлаа. Надад хэчнээн эвгүй байв. Би хаана, яаж хүрэх, гүйцэхээ мэдэхгүй байлаа.... Уй гашуудлын орон үнэхээр уйтгартай байдаг юм даа.

VIII

Тэр цэцгийг нь би төдхөн олж мэдлээ. Бяцхан хунтайжийн байдаг гараг дээр тогтмол ургадаг цэцгүүд нь их л жирийн нэг л ишээс гарсан дэлбэтэй бага зай эзэлдэг, хүнд саад болдоггүй юм. Энэ цэцгүүд зүлгэн дундаас өглөө дэлбээгээ дэлгэн, үдэш болохоор ганддаг юм. Урьд өмнө ургаж байсантай огт адилгүй, чухам хаанаас ирсэн нь үл мэдэгдэх энэ нэгэн ургамал цухуйж эхэлсэнд бяцхан хунтайж түүнээс нүд салгалгүй ширтэж байв. Магадгүй энэ нь заан модны шинэ төрөл байж болох юм. Бут нь ургахаа больж, нахиалж эхэллээ. Ногоон цоморлог дотроо нуугдаж байгаа үл таних зочин улам л томорч, улам гоё болж байлаа. Тэр цэцэг өнгө будгийг ихэд эрхэмлэнэ. Нэг өнгөө нөгөөгөөр сольж, дэлбээгээ алгуурхан дэлгэж эхэлсээр... Ямар нэгэн хонхон цэцэг шиг навсайж байхыг үл хүснэ. Гоо сайхнаараа туяа татуулан гайхуулахыг хүснэм. Энэ, тэгэлгүй яах вэ. Хэчнээн сээтэгнүүр гээч!

Өдөр өдөрт л нүүр царайных нь өнгө тодорсоор... Тэгээд нэгэн өглөө, яг нар мандах үед дэлбээгээ бүрэн дэлгэв. Чухам энэхэн хурмыг ч хүртэл хэчнээн хүч хураасан нь үл мэдэгдэх үзэсгэлэнт цэцэг:

— Аяа! би арай гэж сэрлээ.... Намайг өршөөгөөрэй... би бүр зүс царай алдаж... гэж эвшээлгэн хэлэв.

Бяцхан хунтайж, гайхан биширснээ тэвчилгүй:

— Яасан гоё цэцэг юм бэ! гэж дуу алдахад нь:

— Тийм байна уу? Би нартай хамт төрсөн шүү... гэж цэцэг дөлгөөхөн хариулав. Энэ цэцэг дур булаам сайхан учраас зовлон үзээгүй байж таарна гэж бяцхан хунтайж тэр дор нь таалаа.

— Хоолломоор байна. Намайг сайн сайхан сэтгэлээрээ халамжилж байж үзээрэй гэж бяцхан хунтайжаас тэр дорхноо гуйж эхлэв.

Бяцхан хунтайж зовж даруй шүршүүр эрж олоод булгийн усаар услав. Энэхүү гоёмсог ургамал бардам бөгөөд тунимтгай ажээ. Жишээлбэл: нэг өдөр түүний дөрвөн өргөс гарч ирэхэд бяцхан хунтайжид,

— Бар ирвэл ирэг, би барын савраас ч айхгүй гэж хэлэв.

— Манай энэ гараг дээр бар байхгүй, бас бар өвс иддэггүй юм гэж бяцхан хунтайж сөргөөхөд нь:

— Би чинь өвс биш шүү гэж цэцэг гоморхон намжирдана.

— Намайг уучлаарай...

— Би бараас айхгүй, харин салхи надад аюултай байдаг юм.

— Танайд салхи хаах юм байдаггүй юм уу?

“Ургамал салхинаас айна гэж... энэ цэцэг ямар төвөгтэй юм бэ... золгүй хэрэг байна даа” хэмээн бяцхан хунтайж бодов.

— Орой болоход намайг халхавчаар хааж байгаач. Танай энд их хүйтэн байна. Муу л байрласан юм байна. Миний байсан тэнд бол ч... Тэр үгээ гүйцээсэнгүй. Үр төдийхөн байхад нь үүнийг аль нэгтэйгээс энд авчир аа биз. Энэ бусад ертөнцийн талаар юу мэдээ аж. Чамайг дор нь илчилчхэж болох учир худал хэлэх нь даанч тэнэг явдал мөн. Цэцэг бяцхан хунтайжийг бажгадуулах гэсэн шиг уруу царайлж ханиан:

— Энэ халхавч уу?...

— Таны надад хэлсэн зүйлийг авчрах гэснээ энэ яриаг сонсоосой гэж хүлээж байна.

Тэр цэцэг тэгээд ханиалгах нь ихсэж, түүнд худал хэлж байгаагаа итгүүлэх гэж оролдоно.

Бяцхан хунтайж дур сонирхлынхоо сайхан хүслээр түүнийг хайрлах боловч эргэлзлээ. Тэгэхэд нь тэр цэцэг хүчтэй ханиаж, бяцхан хунтайж л ямар их худал үгийг дотночлон хүлээж авчхаад, түүнээсээ болоод зол жаргалгүй мэтээр өөрийгөө санах болов.

Бяцхан хунтайж надад их л итгэсэн байдалтайгаар:

Түүний үгийг дэмий л сонссон юм. Ер нь цэцэг юм хэлэхэд тоомсоргүй л байна билээ. Зүгээр л түүнийг үзэж, анхилам сайхан үнэрээр нь амьсгалж байх хэрэгтэй. Цэцэг гарагийг маань анхилам сайхан үнэрээр дүүргэсэнд баярлахгүй байж чадаагүй юм. Бар, савар ч гэх шиг... энэ яриа нь миний сэтгэлийг догдлуулах ёстой байтал харин би уурлачихсан юм гэж хэлэв.

— Тэгээд би юу ч ойлгоогүй! Үгээр бус үйл ажлаас нь үзэх ёстой. Тэр бол сайхан үнэрээ над бэлэглэн амьдралыг минь тэтгэж байсан. Би түүнээс зугтах ёсгүй байсан. Зальтай овжин үгсийн цаанах энхрий зөөлөн чанарыг нь тааж мэдэх ёстой л байж. Цэцгүүд бол тийм ч туйлбартай биш. Тэр үед гэнэн бага байсан болохоор юмыг хайрлаж сураагүй байлаа гэж бяцхан хунтайж надад хэлэв.

IX

Тэр нүүдлийн шувуутай аялахаар шийдсэн шиг надад ойлгогдсон. Өглөө явахдаа гарагаа яг ёс журмаар эмхэлж галт уулынхаа тогоог хичээнгүйлэн цэвэрлэв. Тэр хоёр галт уул эзэмшдэг аж. Энэ нь өглөөний ундаа халаахад таатай байлаа. Тэр бас нэг сөнөсөн галт уултай. Юмыг яаж мэдэх вэ? гээд бас сөнөсөн галт уулаа ч цэвэрлэдэг байв. Хэрэв галт уулуудаа сайн цэвэрлэсэн бол жигд зугуухан халж эхэлдэг байжээ. Галт уулын оргилох нь зуухны гал шиг байдаг. Манай газар дээр, галт уулуудаа цэвэрлэхэд бид хэтэрхий жижигхэн учраас санаан зоргоор цэвэрлэж хүчирдэггүй. Тэр ч байтугай бидэнд хэчнээн гай учруулдаг билээ дээ.

Бяцхан хунтайж заан модны сүүлийн ургасныг жаахан уйтгарлан зулгааж байв. Дахиад эргэж ирэхгүй байхдаа гэж бодно. Харин энэ өглөөний гэр зуурын бүх ажил нь түүнд их л хөнгөн шингэн юм шиг санагдаж байлаа. Тэр цэцгээ сүүлчийн удаа услаад, бүрхүүлийнх нь доор тавихаар бэлтгэж байхдаа уйлмаар санагджээ.

— Үүрд баяртай гэж цэцэгтээ хэлэв. Цэцэг хариу дуугарсангүй.

Цэцэг ханиалгаад унав. Энэ нь шуухинаа хүрснийх бишээ.

— Би тэнэг байжээ. Намайг өршөөгөөрэй. Үйл хэрэг тань бүтэмжтэй байх болтугай гэж цэцэг нь хэлэв.

Тэр огт зэмлэсэнгүйд нь бяцхан хунтайж их гайхжээ. Тэр шилэн бүрхүүл бариад мэгдэн сандарч зогсоно.

— Тийм ээ, би чамд хайртай. Миний буруугаас чи юу ч мэдсэнгүй. Энэ ч чухал биш л дээ. Чи бас над шиг тэнэг байжээ. Үйл хэрэг тань бүтэмжтэй байх болтугай... Энэ бүрхүүлийг зөнгөөр нь орхи. Надад огт хэрэггүй гэж хэлэхийг нь сонслоо.

— Харин салхи...

— Ийм хамрын шуухинаа онц юм биш дээ. Шөнийн цэнгэг агаарт би зүгээр болно. Би бол цэцэг шүү дээ.

Харин зэрлэг амьтан, шавж хорхой...

— Хэрэв би эрвээхэйг таних гэвэл хоёр гурван авгалдай авчрах хэрэгтэй юм. Үнэхээр гоё шүү. Эсвэл хэн нэг нь намайг эргэх үү?

Чи хол байх юм даа. Би ан амьтнаас огт айхгүй. Надад саврууд бий.

Тэр дөрвөн өргөсөө дотночлон үзүүллээ. Тэгээд:

— Битгий ингэж уяад бай. Энэ чинь уур хүргэж байна. Чи явахаар шийдсэн. Яв! гэлээ.

Тэр бяцхан хунтайжид уйлж байгаагаа үзүүлэхгүйг боджээ.
Энэ үнэхээр омгорхог цэцэг байлаа...

Х

Бяцхан хунтайж гарагхан 325, 326, 327, 328, 329, 330 орчим хавьд байлаа. Тэр өөрөө эдгээр бүх гарагаар дайрч ямар нэг ажил хийж юм сурах гэж боджээ.

Хамгийн анхны гараг дээр нэг хаан амьдарч байжээ. Энэ хаан, сүр жавхлантай, их энгийн, цагаан чандага эмжээртэй час улаан хувцастай эрхэмсэг сүртэй суудалдаа залран суух аж.

— Хаан, бяцхан хунтайжийг хараад, аа! албат маань гэж дуу алдав.

— Бяцхан хунтайж:

— Намайг хэзээ ч үзээгүй байж, тэр яаж таньж байгаа юм бол! гэж бодлоо. Хаадад өөрөөс нь бусад хүмүүс албат мэт харагддагийг бяцхан хунтайж мэдэхгүй аж.

— Наашаа ойрт чамайг сайн харъя гэж хаан хүн бусдад хэрхэн ханддаг шигээ бяцхан хунтайжид хэллээ.

Гайхамшигт хувцасныхаа хормойгоор гарагийг бүрхчихсэн энэ хааны хаана суухаа бяцхан хунтайж олж ядан байлаа. Тэр зогсоод байгаа болохоор ядарч, эвшээв.

— Хааны дэргэд эвшээнэ гэдэг ёс төрд их харш хэрэг дээ. Эвшээхийг хориглоно, хэмээн эзэн хаан бяцхан хунтайжид хэлэв.

Санаандгүй эвшээчихлээ. Би их хол аяллаа, унтаж чадаагүй гэж бяцхан хунтайж хариу өчив.

— Тэгвэл эвшээхийг чамд тушааж байна. Олон жил хүний эвшээхийг би үзсэнгүй. Эвшээх бол надад их сонин зүйл. Аль вэ! дахиад эвшээ. Энэ бол ёс журам гэж хаан айлдлаа.

Айж байна... Би огт чадахгүй... гэж бяцхан хунтайж час улайчихсан нам дуугаар хариу өчив.

— Хм! хм! Тэгвэл би... эвшээхийг чамд тушааж байна, үгүй бол... гэж хаан сүрдүүлнэ.

Хаан уурласнаасаа болон үгээ хэлж чадахгүй ээрэв бололтой.

Учир нь хааныг онцгойлон хүндлэх ёстой л доо. Хаан дуулгаваргүй байдлыг тэвчиж чадахгүй л дээ. Энэ бол эзэн хааны онцгой эрх билээ. Харин хаан ухаант хүн болохоор ямагт ухаалаг тушаал өгнө.

“Хэрэв би генералдаа тэнгисийн цахлай шиг эргэлдэн нис гэж тушаасан бол тэр захирагдахгүй байхад түүний буруу биш. Энэ нь миний алдаа болно” гэж шуудхан хэллээ.

— Би сууж болох сон болов уу? гэж бяцхан хунтайж зовонгуйхан лавлав.

— Чамайг суу гэж тушааж байна хэмээн сүрлэг хувцасныхаа хормойг татлаа Бяцхан хунтайж гайхав. Гараг жижигхэн байлаа. Хаан юугаа хаанчилдаг юм бол? гэж бодон:

— Ноёнтон, танд асуулт тавихыг минь өршөөн соёрхоно уу?... гэж бяцхан хунтайж хэлэв.

— Надаас асуу гэж тушаан, хаан тэвдүүхэн хариулав.

— Ноёнтон... юуг хаанчилдаг юм бэ, та?

— Бүгдийг

— Бүгдийг ээ?

Энэ газар бас бусад бүх гараг одод бүгд надад захирагдана гэж хаан гараа занган хэлэв. Эд бүгдийг та захирдаг гэж үү? хэмээн бяцхан хунтайжийн лавлахад

— Тийм... гэв.

Тэгвэл энэ эзэн хаан хэмжээгүй эрхт төдийгүй, юм бүхнийг захирдаг юмаа гэж бодон:

— Одод танд үг дуугүй захирагддаг уу?

— Тэгэлгүй яах вэ. Үг дуугүй захирагдана. Би зарчимгүй байдлыг тэвчдэггүй гэв.

Энэ чадвар бяцхан хунтайжийн дурыг татав. Хэрэв тэр өөрөө эрхээ хадгалж чадвал, сандлаа хөдөлгөлгүйгээр, нэг өдөр нарны шингэхийг 44 удаа төдийгүй, харин 72, бас 100, мөн 200 удаа ч үзэж чадах нь ээ. Бяцхан хунтайж орхиж ирсэн гарагаа дурсан баахан уйтгарлавч, хаанаас зориг гарган:

Би нар шингэхийг үзэх юм сан... хүслийг минь хангаач... Наранд шингэхийг тушаан соёрхоно уу?... гэж хэлэхэд нь:

— Хэрэв би генералд эрвээхэй шиг нэг цэцгээс нөгөө цэцэг рүү нис гэх юм уу, эсвэл нэгэн эмгэнэл бич, аль эсвэл тэнгисийн цахлай шиг эргэлдэн нис гэж тушаахад үүнийг генерал биелүүлэхгүй бол тэр буруутан болох уу, би буруутан болох уу?

— Та буруутан болно, гэж бяцхан хунтайж шуудхан хэллээ.

— Яг зөв. Хүн бүрээс юу хийж чадахыг нь урьдаас асуух хэрэгтэй. Захирагч бол эхлээд оюун ухаандаа бодох ёстой. Хэрэв чи ард түмэндээ далайд унацгаа гэж тушаавал хувьсгал болох болно доо. Би дуулгавартай байхыг л шаардах эрхтэй, учир нь миний тушаал зөв зүйтэй гардаг.

— Нар шингэх яалаа? гэж, нэг юм асуухаараа мартдаггүй заншлаараа бяцхан хунтайж шалгаав.

— Нар шингэхийг чи үзнэ. Би түүнд шаардана. Гэхдээ тохиромжтой цагийг харгалзах ёстой. Үүнд л эзэн хүний цэц, ухаан байдаг юм шүү дээ.

— Хэдийд тэр нь болдог юм бэ? хэмээн бяцхан хунтайж лавлан асуув.

— Хм! хм! гэж хуанлийн хуудас эргүүлэн хм! хм! тэр нь барагцаалбал... барагцаалбал... өнөө оройн 7 цаг 40 минутын үед болно доо! Миний яаж сайн захирдгийг чи харна аа гэж хаан хэлэв.

Бяцхан хунтайж эвшээлээ. Нар шингэнэ гээд хуурч байгаад харамсана. Тэгээд бүр уйдчихаад:

— Энд надад хийх юм алга би буцна аа! гэж хаанд хэлэв.

— Битгий яв. Би чамайг сайдаар томилъё.

— Юуны сайд?

— Шүүх цаазын.

— Шийтгэх хэн ч байхгүй шүү дээ!

— Яаж мэдэх вэ энэ чинь. Би хаанчилж байгаа үедээ аялаагүй л байгаа юм. Нас сүүдэр дээр гарч, сүйх тэрэг тавих зайгүй явган явах ядаргаатай байдаг юм даа.

— Өө! би гарагийн нөгөө талыг аль хэдийн үзчихсэн шүү гэж бяцхан хунтайж толгой хаялан хэлэв. Тэнд огт хүн байхгүй...

Чи өөрийгөө шүүхгүй юү. Энэ бүр хэцүү. Өөр хүнийг шүүхээс өөрөө өөрийгөө шүүх нь хавьгүй хэцүү байдаг юм. Хэрэв чи өөрөө өөрийгөө шүүж чадвал, чи ёстой үнэхээр ухаантай хүн болно доо гэж хаан хэллээ.

— Би юү, хаана ч би өөрийгөө шүүж чадна. Тэгэхээр танай энд байх хэрэг алга даа гэж бяцхан хунтайж эсэргүүцэв:

— Хм! хм! би сайн санаж байна, манай энэ гараг дээр хэд алхахад л нэг хөгшин үхэр хулгана бий дээ гэж хаан хэллээ. Би шөнө түүнийг сонсдог. Чи энэ хөгшин үхэр хулганыг шүүж чадна. Үе үе чи түүнд алах ял зааж болно. Чиний хууль цааз түүний амийг хамгаална. Тэгээд чи удаа дараа өршөөх болно. Чи түүнийгээ хайрлана. Тэр чинь ганцхан шүү дээ,

— Бяцхан хунтайж, би алах ял заахад дурлахгүй байна харин явмаар л байна гэв.

— Болохгүй гэв, хаан.

Харин бяцхан хунтайж явах замдаа аль хэдий гарчихсан боловч хөгшин эзэн хааныг гомдоохгүйг хичээж:

Хэрэв таны соёрхол яг л ёсчлон дагуулахыг хүсдэг юм бол надад их л ухаалаг тушаал өгөх сөн. Жишээлбэл: нэг минутын дотор яв гэж надад тушаах сан. Тэр надад зохистой боломж санагдана.

Хаан юм хэлсэнгүй. Бяцхан хунтайж эхлээд хэсэг зуур эргэлзсэнээ, нэг санаа алдан, явахаар хөдөллөө.

— Би чамайг миний элчин сайд болгоно гэж хаан яаран хашхирлаа. Тэр ямар ч эсэргүүцлийг тэвчин хүлцэж чадамгүй мэт дүртэй байв.

Бяцхан хунтайж, том хүмүүс мөн ч сонин юм даа гэж бодон аяллаа үргэлжлүүлэв.

XI

Хоёр дахь гараг дээр нэр алдарт дуртай нэг хүн амьдардаг ажээ.

— Аяа! энэ чинь намайг хүндэтгэх хүн ирлээ! хэмээн алсаас дуу алдан бяцхан хунтайжийг тэр нэр алдарт дуртай хүн угтав. Нэр алдарт дуртай хүмүүст бусад бүх хүн өөрөөр нь бахархаад байх шиг санагддаг билээ.

— Амар байна уу! Та ямар инээдмийн малгайтай юм бэ? гэж бяцхан хунтайж хэлэв.

— Энэ нь мэндлэхэд зориулагдсан юмаа гэж нэр алдарт дуртай хүн хэлэв. Удтал алга ташин намайг хүлээж авахад би энэ малгайгаар мэндэлдэг юм. Харамсалтай нь хэн ч үүгээр явахгүй л юм даа.

— Аа, тийм үү? хэмээн бяцхан хунтайж нэг л ухаарахгүй байв. Алгаа таш гэж нөгөө нэр алдарт дуртай хүн маань зөвлөв.

Бяцхан хунтайж хэлсэн ёсоор нь алгаа ташив. Өнөө хүн маань, малгайгаа аван мэхэсхийн ёслов.

— Энэ чинь харин, хааныд хийсэн айлчлалтаас зугаатай юм байна даа гэж бяцхан хунтайж бодов. Бяцхан хунтайж дахиад алга ташив. Өнөө хүн малгайгаа аван дахин дахин ёсолно.

Таван минут дасгал хийсний дараа нэг янзын энэ тоглоомд бяцхан хунтайж ядарлаа.

— Малгайг унагаах гэвэл яах ёстой вэ? гэж бяцхан хунтайж асуулаа.

Өнөө хүн түүнийг дуулсангүй. Энэ хүн магтаалаас өөр үг хэзээ ч дуулдаггүй аж.

— Чи намайг үнэхээр их магтаж байна уу? гэж өнөө хүн бяцхан хунтайжаас асуув.

— Магтах гэж юу гэсэн үг вэ?

Магтан бахдах гэдэг бол, намайг энэ гарагийн хамгийн сайхан, дээд зэргийн хувцастай, туйлын баян, гоц ухаантай гэж танихыг хэлж байгаа юм.

— Энэ гараг дээр чи ганцаараа байгаа биш үү?

— Надад тусал. Ямар ч гэсэн намайг магт!

— Би чамайг бахдаж байна хэмээн мөрөө хавчин, чи юунд үүнийг сонирхоод байгаа юм бэ? гэж бяцхан хунтайж хэлэв.

Бяцхан хунтайж явлаа.

Том хүмүүс үнэхээр сонин улс шүү гэж бодон аяллаа үргэлжлүүлэв.

XII

Дараагийн гараг дээр нэг архичин амьдардаг байлаа. Энэ айлчлалт их хурдан болж, бяцхан хунтайж бүр уруу царайлав.

— Тэнд чи юу хийж байгаа юм бэ? гэж бөөн хоосон, юмтай шилний өмнө гөлрөн сууж байгаа архичнаас бяцхан хунтайж асуулаа.

— Ууж л байна гэж, нэг л гуньхарсан аясаар архичин хэлэв.

— Яагаад чи уугаа вэ? гэж бяцхан хунтайж асуухад,

— Мартах л гэж, хэмээн архичин хариулав.

— Юуг мартах гэж? хэмээн бяцхан хунтайж хэдийнээ харамсан байсан зүйлээ лавлалаа.

— Өөрийнхөө шившигтэй байдлыг мартах гэсэн юм гэж толгой дохив.

— Юун шившиг? гэж туслах гэсэн хүслээр бяцхан хунтайж лавлалаа.

— Уухын шившиг! гээд архичин таг чиг болчхов.

Бяцхан хунтайж гайхасхийн явлаа.

Том хүмүүсийн хачин юм хийдэг нь аргагүй л үнэн юм даа гэж бодон аяллаа үргэлжлүүлэв.

XIII

Дөрөв дэх гараг дээр нэг олз хайгч хүн байлаа. Бяцхан хунтайжийг очиход толгой өндийлгөх завгүй байгаа ажээ.

— Амар байна уу? Тамхи чинь унтарчхаж гэв.

— Хоёр дээр нэмэх нь гурав тэнцэх нь тав. Тав долоо тэнцүү арван хоёр. Арван хоёр гурав тэнцүү арван тав. Сайн байна уу? арван тав долоо тэнцүү хорин хоёр. Хорин хоёр зургаа тэнцүү хорин найм. Хүүш! Энэ чинь 500 сая 622 мянга 731 юм байна шүү.

— Юун 500 сая вэ?

— Хм? Чи байгаад л байгаа юм уу? 501 сая... би огт мэдэхгүй... Миний ажил жигтэйхэн их! Би хичээнгүй ажилладаг, дэмий чалчих зав алга! Тав хоёрын долоо...

— 501 сая юу юм бэ? гэж бяцхан хунтайж дахиад л асуулаа Бяцхан хунтайж амьдралдаа, тавьсан асуултаасаа буцаж үзээгүй билээ.

— Завгүй хүн маань толгойгоо өндийлгөн:

— Энэ гараг дээр намайг тавин дөрвөн жил амьдрахад гурван саад учрав. Хамгийн анхны нь, хорин хоёр жилийн өмнө, хаанаас ч юм бэ бүү мэд нэг жуулга унаж билээ. Тэгэхэд их аймшигтай дуу гарч, би тооцоондоо дөрөв алдсан юм. Хоёр дахь удаагийнх нь арван нэгэн жилийн өмнө болсон. Үе мөч өвдсөн юм. Би дасгал хийхээ больчихов. Надад тэнэх зав алга. Би чинь томоотой хүн шүү дээ. Гурав дахь удаагийнх нь энэ дээ! Би 501 сая... гэл үү дээ.

— Сая юу юм бэ?

Завгүй хүн маань бяцхан хунтайжийг огт амраахгүй нь гэж мэдээд:

— Огторгуйд хааяа харагддаг сая сая жижиг зүйлс гэв.

— Ялаа юу?

— Хаанаас даа, гялалзаад байдаг жижиг зүйлс

— Зөгий юу?

— Үгүй ээ. Залхуу хүнийг санаашруулдаг алтлаг жижиг зүйлс.

Би чинь сүрхий ажилтай хүн шүү дээ! Би мөрөөдөх завгүй байдаг.

— Өө! Од уу?

— Зөв. Од.

— Чи 500 сая одоор яах юм бэ.

— 501 сая 622 мянга 731. Би юм тодорхой байхад дуртай, сүрхий онцлогтой хүн шүү.

— Чи энэ одоор яах юм бэ?

— Би оддоор яадаг юм бэ гэж үү?

— Тийм.

— Яах ч үгүй л дээ, Би тэднийг эзэмшдэг юм.

— Оддыг чи эзэмшдэг гэж үү?

— Тийм.

— Эрт би нэг хаантай дайралдсан, тэр бол...

— Хаад эзэмшдэггүй юм. Тэд “хаанчилдаг” юм. Энэ чинь шал өөр.

— Оддыг эзэмшээд чамд ямар ашиг байдаг юм бэ?

— Намайг баяжуулдаг юм.

— Баяжаад чи яах юм бэ?

— Хүний олсон өөр оддыг худалдаж авахад хэрэглэнэ.

Тийм ч юм даа, нөгөө архичин шиг л солиорсон эд юм уу даа гэж бяцхан хунтайж дотроо бодлоо.

Тэгээд өөр юм асуусан нь:

— Оддыг яаж эзэмшдэг юм бэ?

— Хэний оддыг гэж нөгөө хүн уцаарлангуй хэллээ.

— Би мэдэхгүй л дээ. Хэнийх ч биш биз.

— Тэгвэл минийх. Хамгийн түрүүнд санаачилсан хүн би биз дээ

— Тэгвэл болоо биз дээ.

— Тэгэлгүй яах вэ. Чи алмаас олбол, тэр чинийх л болно шүү дээ. Өөр хэнийх ч биш. Чи хүн амьтангүй арал олбол бас л чинийх болно. Чи хамгийн түрүүн нэг үнэтэй санаа олоход чи л түүнийг эзэмших эрхийг эдэлнэ. Энэ чинь чинийх л гэсэн үг биз дээ. Би оддыг эзэмшдэг, надаас өмнө хэн ч, хэзээ ч үүнийг эзэмшихийг мөрөөдөөгүй.

— Энэ ч үнэн, гэж бяцхан хунтайж хэллээ. Чи тэднээр юу хийдэг юм бэ?

— Би тэднийг захирч байна. Би тэднийг тоолж, дахин тоолж байдаг юм даа. Энэ хэцүү. Харин махруу хүн л дээ! гэж нөгөө хүн хэлэв.

Бяцхан хунтайж нэг л сэтгэл хангалтгүй байлаа.

— Хэрэв би хүзүүний ороолттой бол, хүзүүгээ ороогоод л өөрийн болгож авна. Хэрэв би цэцэгтэй бол цэцгээ түүгээд л өөрийн болгож авна. Тэгвэл чи оддыг түүгээд авч чадахгүй шүү дээ?

— Үгүй ээ, би тэдний чинь банканд хадгалж чаддаг.

— Энэ чинь юу гэсэн үг вэ?

— Энэ бол, однуудаа жижиг цаасанд бичнэ. Тэгээд шургуулгатай шүүгээнд хийгээд цоожилно гэсэн үгээ.

— Ингээд л гүйцээ юү!

— Тэгээд болоо!

Бяцхан хунтайж энэ чинь зугаатай юм даа гэж бодов. Энэ нэлээн хийсвэр юм. Нэг их ч ноцтой юм биш.

Бяцхан хунтайжийн чухал зүйлийн талаарх санал, том хүмүүсийнхээс их өөр байв.

— Би цэцэг эзэмшдэг байхдаа өдөр бүр усалдаг байсан даа. Би гурван галт уул эзэмшиж байхдаа долоо хоног бүр тогоог нь цэвэрлэж байлаа. Би сөнөсөн галт уулаа ч гэсэн цэвэрлэдэг байсан. Энэ миний галт ууланд ч, миний цэцэгт ч тустай, би ч тэднийг эзэмшдэг. Тэгтэл чи одод ашиггүй... гэж бяцхан хунтайж хэллээ.

Нөгөө олз хайгч хэлэх үгээ олж ядан дэмий л амаа ангалзуулна.

Бяцхан хунтайж явлаа.

Том хүмүүс хачин жигтэй юманд дуртай улс юм даа гэж бодон аяллаа үргэлжлүүлэв.

XIV

Тав дахь гараг их сонирхолтой байлаа. Бусдаасаа хамгийн жижиг нь юм. Энд зөвхөн гудамжны нэг дэнлүү, түүнийг байрлуулах л зай байлаа. Хүн ч үгүй, орон байр ч үгүй гараг дээр нэг дэнлүү, дэнлүүч хоёр юунд үйлчилдгийг бяцхан хунтайж очихоос нааш тайлбарлаж чадмааргүй. Тэр дотроо л

— Энэ тэнэг хүн байж магадгүй. Саяын дайралддаг хаан, нэр алдарт дуртай хүн, архичин, олз хайгчаас бага ч тэнэг байж болох юм. Түүний ажил жаахан ч гэсэн утгатай байж мэднэ. Тэр хүнийг дэнлүүгээ асаахад, од гараг, цэцэг ургаж байгаа юм шиг байж болно. Тэр хүнийг дэнлүүгээ унтраахад од шингэж, цэцэг нойрсдог ч байж болно. Сайхан л ажил. Сайхан болохоороо үнэхээр ашигтай гэж бодов.

Гаригт ойртож очингуутаа, дэнлүүчийг найрсгаар мэхийн мэндлэн:

— Амар байна уу? Яагаад дэнлүүгээ унтраагаа вэ? гэхэд

— Ингэхлээр тохиролцсон юм: Амар байна уу? гэж дэнлүүч хариулав.

— Тохиролцоно гэж юу вэ?

— Дэнлүүгээ унтраахыг хэлж байгаа юм. Оройн мэнд хүргэе.

Тэр дахиад асаав.

— Яагаад дэнлүүгээ дахиад асаачхав?

— Ингэж л тохиролцсон юм гэж дэнлүүч хариуллаа.

— Би ойлгохгүй юм гэж бяцхан хунтайж хэлэв.

— Ойлгож цөхөх юм байхгүй. Тохироо гэдэг бол тохироо л байгаа юм. Өдрийн мэнд хүргэе.

Тэгээд дэнлүүгээ унтраав.

Дараа нь дэнлүүч дөрвөлжин улаан алчуураар духныхаа хөлсийг арчлаа.

— Би ер бусын юм хийж байна. Урьд ухаалаг зүйл байсан юм. Би өглөө унтрааж, орой асаадаг байлаа. Би өдөр амарч, шөнө унтдаг...

— Энэ зуунаас өнөөх тохироо чинь өөрчлөгдсөн үү?

— Үгүй өөрчлөгдөөгүй гэж дэнлүүч хэлэв. Гунигтай хэрэг байна даа! Гараг жилээс жилд хурдан эргэж байхад тушаал өөрчлөгдөөгүй!

— Тэгээд гэж бяцхан хунтайжийн асуухад,

— Тэгээд одоо гараг нэг минутад нэг эргэж, би агшин ч амс хийх завгүй боллоо. Би минут тутам асааж, унтраана.

— Ямар хөгтэй юм бэ? Чиний энд өдөр ганц минут үргэлжилнэ гэнээ! Хөгтэй юм ер үгүй. Бид ярилцсанаас хойш нэг сар болчихлоо гэж дэнлүүч хэлэв.

— Нэг сар аа?

— Тийм. 30 минут 30 хоног! Оройн мэнд хүргэе. Тэгээд дэнлүүгээ асаав. Бяцхан хунтайж түүнийг хараад, өөрийн үгэндээ эзэн болдог энэ дэнлүүчийг хайрлав. Бяцхан хунтайж, өөрийнхөө нар шингэхийг үзэх гээд сандлаа чирээд л дагаж байснаа саналаа. Нөхөртөө туслахыг эрмэлзэн.

— Чи байна аа...чи хүссэн үедээ амрах арга би мэднэ ээ... гэхэд,

— Би дандаа л хүсдэг гэж дэнлүүч ч хэлэв.

Хэлсэн үгэндээ эзэн болдог мөртөө залхуу байж болно шүү дээ гээд Бяцхан хунтайж үргэлжлүүлэн:

— Чиний гараг үнэхээр жижиг юм. Чи гурав том алхаад нэг тойрч чадна. Чи дандаа нартай байхын тул удаан алхах хэрэгтэй. Чи амрахаа хүсэхээр л яваарай... чиний хүссэнээр өдөр удаан үргэлжилнэ.

— Энэ чинь надад ашигтай ч юм болохгүй. Би унтах их дуртай гэж дэнлүүч хэлэв.

— Энэ чинь золгүй хэрэг байна даа гэж бяцхан хунтайж хэлэхэд

— Тийм ээ. Энэ золгүй хэрэг гэж дэнлүүч давтав. Өдрийн мэнд хүргэе. Тэр дэнлүүгээ унтраав.

Бяцхан хунтайж аяллаа үргэлжлүүлэн, хаан, нэр алдарт дуртай хүн, архичин, олз хайгчийн аль нь ч гэсэн үүнийг тоохгүй юм байна даа гэж саналаа. Харин миний санахад энэ хүн л тэдний хэнээс нь ч дээр юм шиг... учир нь энэ хүн зөвхөн амиа бодогч биш бололтой.

Бяцхан хунтайж харамсан санаа алдаж, бодсон нь:

— Ганцхан үүнтэй л найзалж болох юм даа. Түүний гараг дэндүү жижиг. Хоёр хүн байх зайгүй...

Бяцхан хунтайж энэ гараг дээр хоногт 1440 удаа нар шингэдэгт нь харамсах бөгөөд чухам юунд харамсаж байгаагаа хэлж зүрхлэхгүй байлаа.

XV

Зургаа дахь гараг бол урьдаас арав дахин уудам. Энэ гараг дээр хэмжээгүй олон ном бичдэг өвгөн амьдардаг ажээ.

— Хараач! Нэг жуулчин! гэж дуу алдан бяцхан хунтайжийг угтав.

Бяцхан хунтайж ширээн дээр сууж, жаахан амьсгаа дарав. Аль хэдийнээс аялсан нь илэрхий!

— Хаанаас ирэв? гэж Өвгөн түүнээс асуув.

— Энэ ямар том ном бэ? Энд та юу хийж байгаа юм бэ? гэж бяцхан хунтайж хэлэв.

— Би газар зүйч гэж Өвгөн хэлэв.

— Газар зүйч гэдэг юу вэ?

— Энэ бол цөл говь, уул ус, хот тосгон, далай тэнгис хаана хаана байдгийг мэддэг эрдэмтэн гэв.

— Энэ ёстой сонин юм гэж бяцхан хунтайж хэллээ. Энэ яг мэргэжил дээ! Газар зүйчийн гарагийг эргэн тойрон үзэж харлаа. Хачин сонирхолтой гарагийг тэр хэзээ ч үзээгүй билээ.

— Таны гараг гоё юмаа. Далай бий юү?

— Газар зүйч, би түүнийг мэдэж чадаагүй гэв.

— Өө! (Бяцхан хунтайжийн урам хугарав) Уул бий юу?

— Газар зүйч, би түүнийг мэдэж чадаагүй гэв.

— Тосгон хот, гол мөрөн, говь цөл?

— Газар зүйч, би түүнийг огт мэдэж чадаагүй гэв.

— Та чинь газар зүйч биз дээ!

— За тийм, Харин би жуулчин биш гэж газар зүйч хэллээ. Би жуулчдын талаар бүүр дутагдаж байна. Хот тосгон, гол мөрөн, уул ус, далай тэнгис, говь цөлийг газар зүйч л тооцоолдог юм биш үү. Газар зүйч хэсэж тэнэхэд онцгой чухал. Тэр албан өрөөнөөсөө гардаггүй. Харин тэндээ жуулчдыг хүлээн авдаг. Тэр тэднээс асууж лавлан, дурсамж тэмдэглэлийг нь авдаг. Тэдний хэн нэгнийх нь тэмдэглэл их сонин санагдвал, газар зүйч тэр жуулчны анкетыг бүртгэдэг.

— Яагаад ингэдэг билээ?

— Учир нь, тэр жуулчин, газар зүйн номд алдаатай зүйл оруулж, уншигчдыг хуурч болох юм. Бас согтууруулах ундааны зүйлийг хэт хэрэглэсэн ч байж болно.

— Яагаад ингэдэг юм бэ? гэж бяцхан хунтайж дахин асуув.

— Согтуу хүнд нэг юм хоёр харагддаг. Тэгээд газар зүйд, тэнд байгаа ганц уулыг, хоёр болгон тэмдэглэж болохгүй биз.

— Муу жуулчин болох, нэг хүнийг би танина гэж бяцхан хунтайж хэллээ.

— Энэ байж болно. Мөн, сайн жуулчин санагдвал түүний нээлтэд анкет хийдэг.

Түүнийг очиж үздэг үү?

— Энэ төвөгтэй асуудал. Жуулчдыг баримтаар нотлохыг шаарддаг. Жишээлэхэд, нэгэн том уулыг нээлээ гэвэл, том чулуунаас нь авчрахыг шаарддаг.

Газар зүйч гэнэт сэтгэл нь хөдлөн,

— Чи чинь, холоос ирсэн биз дээ! Чи жуулчин! Гарагийнхаа тухай надад бичүүлээч! гэв.

Тэгээд газар зүйч дансаа гарган, харандаагаа барив. Жуулчны яриаг харандаагаар эхлэн тэмдэглээд, нотолгоогоо батлахаар нь бэхээр бичдэг аж.

— Тэгээд? гэж газар зүйч асуулаа.

— Хөө! манайд гоц гойдын сонин юм байхгүй, их жижигхэн гараг л даа. Би гурван галт уултай, Хоёр нь сөнөөгүй, нэг нь сөнөсөн галт уул. Хэзээг мэдэхгүй.

— Хэзээг мэдэхгүй гэнэ ээ, гэж газар зүйч хэлэв.

— Надад бас нэг цэцэг бий.

— Бид цэцэг тэмдэглэдэггүй гэв, газар зүйч

— Энэ яагаад билээ! Хамгийн гоё шүү дээ!

— Цэцэг богино настай л даа.

— “Богино настай” гэдэг нь юу гэж байгаа юм бэ?

— Газар зүйн ном бусад ном зохиолоос илүү оновчтой байх ёстой гэж газар зүйч хэлэв. Газар зүйн ном хэзээ ч хуучирдаггүй. Нэгэн уул байраа өөрчлөх нь тун ховор. Далайн ус шавхаг дах нь бараг үгүй. Бид мөнхийн зүйлийг бичдэг.

— Сөнөсөн галт уул сэргэж болно хэмээн, бяцхан хунтайж яриаг нь тастав. Богино настай гэдэг нь юу гэж байгаа юм бэ?

— Галт уул сөнөсөн үү, үгүй юү гэдэг нь өөр хэрэг. Бид уул гэдгийг нь тооцдог. Тэр бол өөрчлөгддөггүй гэж газар зүйч хэлэв.

— Богино настай гэдэг нь юу гэж байгаа юм бэ? хэмээн нэг юм асуусан бол салдаггүй заншлаараа бяцхан хунтайж дахин асуулаа.

Энэ бол удахгүй сөнөж алга болох зүйлийг хэлдэг юм гэв.

— Миний цэцэг удахгүй алга болно гэж үү?

— Тэгэлгүй яах вэ.

Миний цэцэг богино настай гэж үү дээ. Дөрвөн өргөс түүнийг хамгаалж байдаг юм. Гэртээ ганцаарыг нь орхисон! гэж бяцхан хунтайж бодов.

Энэ бол орхисон цэцгээ анх удаа эргэж бодсон бодол юм. Гэвч зориглон.

— Юуг явж үзэх зөвлөгөө өгнө үү? гэж асуув.

— Дэлхий гэдэг гарагийг үз. Энэ их алдартай... гэж газар зүйч хариуллаа.

Бяцхан хунтайж цэцгээ бодон бодон явлаа.

XVI

Долоо дахь гараг нь Дэлхий.

Дэлхий бол үл мэдэгдэх нэгэн гараг бишээ! Тэнд III хаан (хар арьстныг хүртэл оруулаад) 7000 газар зүйч, 900 мянган хонжоо хайгч, 750 сая согтуу хүн, 311 сая нэр алдарт дуртан, өөрөөр хэлбэл хоёр миллиард орчим том хүн байдаг.

Та нарт газрын хэмжээний талаар ойлголт өгөхийн тулд, зургаан тив дээр, цахилгаан гарахын өмнө дөрвөн зуун жаран хоёр мянга таван зуун арван нэгэн дэнлүүчдийн арми байсныг хэлье.

Жаахан холдоод харахад үнэхээр гялалзаж байдаг. Энэ армийн хөдөлгөөн маш журамтай, дуурийн театрт тоглож байгаа бүжгэн жүжиг шиг л. Шинэ Зеланд, Австралийн дэнлүүчдийн ээлжээр эхэлдэг. Тэд цахилгаан дэнгээ асаагаад унтахаар явцгаадаг.

Дараагийн ээлж нь Хятад, Сибирийн дэнлүүчдэд ирдэг. Тэд алгуурхан далд орж, Орос, Энэтхэгийн дэнлүүчдийн ээлж болдог. Тэгээд Африк, Европынх, дараа нь өмнөд Америкийнхан Сүүлд нь хойд Америкийнхны ээлж болдог. Тайзан дээр гарч ирэх дарааллаа тэд хэзээ ч алддаггүй. Энэ үнэхээр гайхмаар.

Хойд, урд туйлын хоёр дэнлүүч л дэмий сууж, хааш яаш байна? Жилд хоёр удаа дэнлүүгээ асаадаг.

XVII

Үнэн мөнөөрөө явъя гэж бодож байхад жаахан хуурах явдал тохиолддог. Дэнлүүчдийн тухай та нарт чин үнэнээр би арай ч яриагүй. Та нарын мэдэхгүй зүйлд манай гарагийн тухай би буруу ойлголт өгч байгаа ч байж болох юм. Хүмүүс газар дээр тун бага зай эзэлдэг. Хэрэв хоёр миллиард хүн дэлхий дээр амьдардаг бол, өргөн нь хорин мод, урт нь хорин мод болно. Олон нийтийн талбай дээр зогсоогоороо цуглаанд оролцож байгаа юм шиг тэд жаахан шахцалдан хялбархан байрласан байдаг. Номхон дөлгөөн далайн бяцхан арал дээр бүх хүн төрөлхтнийг багтаан байрлуулж болох билээ.

Том хүмүүс та нарт итгэхгүй нь мэдээжийн хэрэг. Тэд их зайтай болохыг санацгаана. Заан мод шиг том гэж өөрсдөө бодоцгооно. Та нар тэдэнд тооцоолохыг зөвлөцгөө. Тэд тоог эрхэмлэнэ. Тоо бодоод өгвөл тэднийг баярлуулна. Гэвч энэ залхуутай ажилд цагаа битгий үр. Энэ ашиггүй. Надад итгэцгээ.

Бяцхан хунтайж газар дээр хэнийг ч хараагүйдээ гайхаж, билээ. Элсэн дотор сарны өнгөт цагариг хөдөлж байхад, гарагаа андуурчхаа юм болов уу хэмээн айж байжээ.

— Сайхан нойрсоорой гэж огт санамсаргүй бяцхан хунтайж мэндлэхэд,

— Сайхан нойрсоорой гэж Могой хэллээ.

— Ямар гараг дээр би уначхав аа? гэж бяцхан хунтайж асуухад нь

— Дэлхий дээр, африкт гэж Могой хариулав.

— Өө!... Дэлхий дээр хүн байдаггүй юм уу?

— Энд бол элсэн цөл. Элсэн цөлд хүн байдаггүй юм. Дэлхий их том шүү гэж могой хэлэв.

Бяцхан хунтайж чулуун дээр суугаад, тэнгэр өөд харан:

— Хүмүүст, өөрсдийнх нь оддыг таниулах гэж одод гэрэлтэж байгаа юм уу даа. Миний гарагийг хар. Тэр яг бидний дээр... Харин ямар хол байна аа! гэж бодов.

— Од гоё шүү. Чи энд юу хийх гэж ирээв? гэж Могой асуув.

— Би цэцэгтэйгээ хүнд байдалд орчхоод гэж бяцхан хунтайж ярилаа. Могой

— Пөөх! гэв.

Тэд хэсэг чимээгүй болов.

— Хүмүүс хаана байна? гэж бяцхан хунтайж асуулаа. Цөлийн дунд ганцаараа юм шиг...

— Хүмүүсийн тэнд ч ганцаараа л байна даа гэж Могой хэлэв.
Бяцхан хунтайж түүнийг харж харж:

— Чи хуруунаас нарийхан ямар сонин амьтан бэ гэв.

— Гэхдээ хааны хуруунаас ч хүчтэй дээ гэж Могой хэлэв.
Бяцхан хунтайж хөхрөн:

— Чи нэг их хүчтэй биш байхаа... Чамд хөл ч байхгүй... Чи аялж ч чадахгүй...

— Хөлөг онгоц шиг л чамайг алс хол аваачиж чадна гэж Могой өгүүлэв. Могой алтан бугуйвч шиг л бяцхан хунтайжийн шилбийг ороож байгаад:

— Би хүнд хүрвэл, түүнийг гарч ирсэн газарт нь л хүргэдэг дээ. Чи бол ариун, чи нэгэн одноос ирсэн шүү дээ...

Бяцхан хунтайж юу ч хэлсэнгүй.

— Энэ хатуу дэлхий дээр, чи хүчгүй ч гэсэн, намайг өрөвдөж байна. Чи гарагаа мөрөөдөн харамсаад байвал нэг л өдөр чамд тусалж чадна би.

— За! би сайн ойлгож байна. Гэхдээ чи юунд дандаа оньсого шиг юм яриад байгаа юм бэ?

— Би тэр оньсогыг чинь тайлж чадна гэж Могой хэлэв. Тэд хэсэг чимээгүй болов.

XVIII

Бяцхан хунтайж элсэн цөлийг гаталж яваад нэг цэцэгтэй дайралдав. Гурван дэлбээтэй л цэцэг, өөр гоц гойд юмгүй...

— Сайн байна уу? гэж бяцхан хунтайжийн мэндлэхэд

— Сайн байна уу? гэж хариулав.

— Хүмүүс хаана байна? гэж бяцхан хунтайж найрсгаар асуув.

Цэцэг нэг өдөр, аянчин өнгөрөхийг харсан юм байжээ.

— Хүмүүс үү? Зургаа юм уу долоо байдаг гэж бодож байна. Би тэднийг хэдэн жилийн тэртээ харсан. Гэвч хаана байдгийг нь мэдэхгүй. Салхи тэднийг дуртай зүгтээ л авч явдаг байх. Тэд үндэсгүй болохоороо их зовдог гэж цэцэг хэлэв.

— Үүрд баяртай гэж бяцхан хунтайж хэлэхэд.

— Үүрд баяртай гэж цэцэг хэлэв.

XIX

Бяцхан хунтайж өндөр ууланд гарав. Түүний өвдгөөр нь татдаг гурван галт уулнаас өөр уул огт үзээгүй билээ. Сөнөсөн галт уул нь сандал болон үйлчилдэг сэн. “Үүн шиг өндөр уул дээрээс, бүх хүн амьтан, бүх л гараг... нэг зэрэг харж чадах юм байна даа” гэж бодов. Гэтэл өндөр байц хаднуудын шовх орой юу ч эс харагдуулах ажээ.

— Сайн байна уу гэж огт санамсаргүй хэлэхэд,

— Сайн байна уу... Сайн байна уу... Сайн байна уу... гэж хадны цуурай цуурайтав.

— Та хэн бэ? гэж бяцхан хунтайж асуухад,

— Та хэн бэ... Та хэн бэ... Та хэн бэ... хэмээн цуурайтна

— Найзалцгаая, би ганцаараа гэхэд,

— Би ганцаараа... би ганцаараа... гэж цуурай давтана.

“Ямар хөгтэй гараг вэ! Энэ бол хув хуурай, шов шовх, шов шорвог ажээ. Хүмүүст төсөөлөн бодох чадвар алга байна. Тэд юу л хэлснийг давтана... Гэртээ би нэг цэцэгтэй. Тэр дандаа эхэлж ярьдаг сан...” гэж бодов.

XX

Бяцхан хунтайж, элс, цөл, хад хавцал цас мөсийг туулан яв явсаар зам оллоо. Энэ зам л хүнд ойрхон хүргэнэ биз.

— Сайн байна уу гэж мэндлэв.

Энэ бол сарнай цэцгийн цэцэрлэг байлаа,

— Сайн байна уу гэж сарнай цэцгүүд хариу мэндлэв.

Бяцхан хунтайж тэднийг ажиглалаа. Өөрийнх нь цэцэгтэй адилхан юм. Та нар чинь ямар гээч цэцэг вэ? гэж тэднээс гайхан асуухад,

— Бид сарнай цэцэг гэцгээв.

— Пөөх! гэж бяцхан хунтайж дуу алдав.

Тэр их харамсана. Цэцэг нь, өөрийнхөө төрлийн дотор ганцаараа гэж ярьсан юм сан. Тэгтэл ганц цэцэрлэгт яг адилхан цэцэг таван мянга байж байна!

“Тэр үүнийг харсан бол эгдүү нь хүрнэ дээ... Энэ инээдтэй зүйлээс зайлахын тулд үхэх гэж байгаа юм шиг учиргүй ханиах байсан даа. Би арчлах үүрэгтэй юм л даа. Хэрэв арчлахгүй сэн бол, тэр үнэхээр үхэж, намайг ичээх байсан сан...” гэж бяцхан хунтайж бодов.

Тэгээд бяцхан хунтайж: Би хорвоо дээр ганцхан байдаг цэцэгтэй гэж санаж байсан чинь хаа сайгүй л ургадаг ерийн л нэг сарнайтай юм байна даа. Миний өвдгөөр татдаг гурван галт уулын магадгүй нэг үүрд сөнөсөн ч, сарнай цэцэг энэ бүхэн маань намайг тийм ч лут хунтайж болгож чадахгүй юм даа гэж бодов. Тэгээд ногоон дээр хэвтээд уйлж байлаа.

XXI

Тэгж байхыг нь үнэг хараад:

— Сайн байна уу хэмээн мэндлэхэд,

— Сайн байна уу гэж бяцхан хунтайж найрсгаар мэндлэн, эргэсэн боловч юу ч үл үзэгдэнэ.

— Би энд байна гэх дуу алимын модон доороос гарлаа.

— Чи чинь хэн бэ? Чи их гоё юмаа... гэж бяцхан хунтайж асуухад

— Би үнэг байна гэлээ.

— Надтай ирж тоглооч, би жигтэйхэн уйтгартай байна... гэж бяцхан хунтайж гуйлаа.

— Би чамтай тоглож чадахгүй. Би чамд дасаагүй гэж үнэг хэлэв.

— Өө өршөөгөөрэй гэж хэлсэн бяцхан хунтайж хэсэг бодсоноо, дахин: — “Дасах” гэж юу гэсэн үг вэ? гэв.

— Чи энд байдаггүй шүү дээ, чи юу эрж яваа юм бэ? гэж Үнэг асуулаа. Бяцхан хунтайж:

— Би хүмүүсийг эрж явна. "Дасах" гэдэг юу гэсэн үг вэ? гэв.

— Хүмүүс, буутай ан хийдэг юм даа. Энэ нь хэчнээн бэрхшээлтэй! Тэд бас тахиа тэжээдэг. Энэ тэдний гол сонирхол. Чи тахиа эрж байна уу? гэж үнэг асуув.

— Үгүй. Би найз нөхдөө эрж байна: "Дасах" гэдэг юу гэсэн үг вэ? гэж бяцхан хунтайж шалгаав.

— Хэт мартагдсан зүйлийг хэлдэг юм гэж Үнэг хэлэв. Энэ нь "Холбоо тогтоох..." гэсэн утгатай.

— Холбоо тогтоох гэнэ ээ?

— Тэгэлгүй яах вэ. Чи бол зуун мянган жижиг хүүхэдтэй яг л адилхан санагдаж байна надад. Чи надад хэрэггүй. Чамд би огт хэрэггүй. Би чамд зуун мянган үнэгтэй л адилхан байгаа. Харин чи надад дасвал бид бие биедээ хэрэгтэй болно. Дэлхий дээр ганцхан чи л минийх болно. Дэлхий дээр би ч ганцхан чинийх болно... гэж үнэг хэллээ.

— Би ойлгож эхэлж байна. Нэгэн цэцэг... миний бодоход тэр надад дасжээ... гэж бяцхан хунтайж хэлэв.

— Тийм байж болно. Дэлхий дээр байгаа янз бүрийн зүйлийг хар л даа... гэж үнэг хэлэв.

— Өө! тэр чинь дэлхий дээр биш шүү гэж бяцхан хунтайж хэлэв. Үнэг их л сонирхолтой хараад:

— Өөр гараг дээр байгаа гэж үү?

— Тийм
— Тэр гараг дээр чинь анчид байдаг уу?
— Үгүй.
— Тэр чинь ямар сонин юм бэ? Тахиа бий биз?
— Байхгүй шүү.
— Ер байх юм гэж алгаа хэмээн үнэг шүүрс алдав.
Үнэг цааш нь,

— Би нэг л хэвийн амьдралтай. Би тахиа агнаж, хүмүүс намайг агнадаг. Бүх тахиа адил. Бүх хүн адил. Би үүнд нь жаахан уйддаг. Харин чи надад дасвал, миний амьдралд нар гарах шиг болно доо. Би бүх хөл чимээнээс нэгийг нь ялгаж таньдаг болно доо. Бусад нь намайг газар доор оруулах дохио болно. Чинийх бол намайг үүрээс дуудах хөгжим шиг л байна даа. Чи хар л даа. Тэнд тариан түрүү байгааг үзэж байна уу? Би талх иддэггүй. Тариан талбайд би татагддаггүй. Энэ уйтгартай! Чи харин алтан шаргал үстэй юм. Чи надад дасвал, ёстой гайхалтай сайхан болно доо энэ чинь! Тариа алтан шаргалтаад ирэхээрээ, тэр чинь чиний дуртгал болно доо, надад. Би тарианы исгэрэн халиурах чимээнд дуртай болно доо...

Үнэг чимээгүй болон, бяцхан хунтайжийг харж харж:

— За аль вэ... надад дасаач! гэв.

— Би дуртай л байна, харин зав алга. Их юм мэдэх найз нөхөд олох хэрэгтэй гэж бяцхан хунтайж хэлэв.

— Ер нь юм, зөвхөн дассан юмаа л таньдаг даа гэж үнэг хариулав. Хүмүүст юм таних завгүй. Худалдаачнаас бүх зүйлээ авдаг. Найз нөхөр худалддаг худалдаачин байдаг сан бол хүмүүст найз гэж байхгүй байх сан. Чи найз нөхөр эрж байгаа бол надад дас!

— Яах хэрэгтэй вэ? гэж бяцхан хунтайж асуухад,

— Тэвчээртэй байх хэрэгтэй гэж үнэг хэлэв. Чи надаас жаахан зайтай өвсөн дунд суугаадах даа. Би чамайг нүднийхээ булангаар харна. Чи дуугүй байгаарай. Хэл андууруулахын эх сурвалж болдог юм шүү. Тэгээд өдөр бүр, чи бага багаар ойртож сууна...

— Маргааш нь бяцхан хунтайж эргэж ирлээ.

— Тогтмол цагт ирж байвал сайн шүү гэж үнэг хэлэв.

Жишээлбэл, хэрэв чи үдээс хойш дөрвөн цагт ирдэг бол, би гурван цагаас л баяр хөөртэй болно. Цаг дөхөх тусам л би улам баяртай болно. Дөрвөн цаг гэхэд, миний сэтгэл догдлон хөдөлж, аз жаргал гэдгийг эдэлнэ дээ! Харин чи хэзээ ч хамаагүй ирвэл, миний сэтгэл зүрх огт хөдлөхгүй... ёс журамтай байх хэрэгтэй.

— Ёс журам гэдэг юу вэ? гэж бяцхан хунтайж асуув.

— Энэ бас л дэндүү мартагдсан зүйлийг хэлж байгаа юм. гэв. Үнэг. Бусад өдрөөс ялгаатай нэг өдөр, бусад цагаас ялгаатай нэг цагт хийдэг юмыг хэлдэг юм. Нэг ёс байна. Жишээлбэл: Миний анчид. Пүрэв гарагт тэд хотын охидтой бүждэг. Тэгэхээр пүрэв гараг надад хамгийн сайхан өдөр! Би усан үзмийн бут хүртэл зугаалдаг. Хэрэв анчид хэдийд ч хамаагүй бүждэг сэн бол бүх өдөр огт ялгаагүй би бүр амралтгүй байх сан билээ.

Ингэж бяцхан хунтайж үнэгэнд дасав. Явах цаг ойртоход:

— Аах!... Би уйлах нь ээ гэв. Үнэг,

— Энэ чиний буруу л даа гэж бяцхан хунтайж хэлэв. Би чамаас муу юм хүсээгүй, харин чи л намайг, чамд дасахыг хүссэн.

— Тэгэлгүй яах вэ гэж Үнэг хэлэв.

— Тэгээд чи уйлах нь уу! гэж, бяцхан хунтайжийг асуухад,

— Тэгэлгүй яах вэ гэв. Үнэг.

— Чи уйлаад ямар ч ашиггүй шүү дээ!

— Тарианы өнгө л надад ашигтайдаа гэж үнэг хэлэв. Тэгээд дахин:

— Сарнайнуудаа очиж хар. Чиний сарнай ертөнц дээр ганцхан л юм гэдгийг чи ойлгоно оо. Чамайг надтай салах ёс гүйцэтгэхээр ирэхэд чинь, нэгэн нууц бэлэг барина.

Бяцхан хунтайж сарнайнуудыг дахиж хараад:

— Та нар миний сарнайтай ер адилгүй. Одоохондоо та нар юу ч биш. Хэнд ч та нар дасаагүй, хэн ч та нарт дасаагүй. Та нар миний Үнэг шиг юм. Нэг үнэг бусад зуун мянган үнэгтэй л адил. Гэвч би нэг үнэг найзтай, одоо тэр ертөнц дээр ганц байдаг юм шиг л болсондоо гэж хэлэв.

Сарнайнууд их ичицгээв.

— Та нар үзэсгэлэнтэй, гэхдээ юу ч биш. Та нарын төлөө хэн ч үхэхгүй. Мэдээжийн хэрэг, миний сарнай наддаа л ганцхан дэргэдүүр нь өнгөрөхөд та нартай адил ерийн л юм шиг харагдах байх. Гэхдээ миний сарнай л та бүгдээс хамгийн чухал, тэгээд ч би л усалдаг. Тэгээд ч би бүрхүүлээр хамгаалсан. Тэгээд эрвээхэйн авгалдайнуудыг алсан. (эрвээхэйн дээ байгаа хоёр гурваас бусдыг) Тэгээд ч сарнайныхаа гомдохыг, биеэ магтан сайрхахыг, заримдаа дуугүй болчихыг нь би мэддэг. Үнэхээр л миний л сарнай даа, тэр чинь гэж сарнайнуудад бяцхан хунтайж хэлэв. Тэр Үнэгэнд буцаж ирээд:

— Үүрд баяртай гэхэд....

— Үүрд баяртай гэв, Үнэг. Энэ миний нууц. Энэ их энгийн зөвхөн сэтгэл зүрхээрээ л хардаг юм. Нүдэнд үзэгддэггүй нь онцлог

л доо.

— Нүдэнд үзэгддэггүй онцлог нь гэдгийг мартахгүй хэмээн бяцхан хунтайж давтан хэлэв.

— Чиний сарнай чамд чухал л юм бол, чи сарнайдаа энэ хэсэг хугацааг алдлаа.

— Сарнайдаа энэ хэсэг хугацааг алдлаа... гэж мартахгүйн тулд бяцхан хунтайж давтав.

Энэ үнэнийг хүмүүс мартчихсан юм. Харин чи түүнийг мартах ёсгүй. Чи дассан юмандаа дандаа хариуцлагатай хандаж байх хэрэгтэй. Чи сарнайдаа хариуцлагатай байна... гэж Үнэг хэлэв. Би сарнайдаа хариуцлагатай байна... гэж, мартахгүйн тулд бяцхан хунтайж давтав.

XXII

- Сайн байна уу хэмээн бяцхан хунтайж мэндлэхэд
- Сайн байна уу хэмээн зам зохицуулагч хариу мэндлэв.
- Чи энд юу хийж байна гэж бяцхан хунтайжийн асуухад,
- Би аялагчдыг мянга мянган хэсгээр ангилж байна. Би

тэдний явдаг галт тэрэгнүүдийг баруун, зүүн тийш нь чиглүүлж өгдөг гэж зам зохицуулагч хариулав.

Гэрэлтсэн хурдан галт тэрэг аянга ниргэж байгаа шиг дуугаран, зам зохицуулагчийн өрөөг чичгэнүүлэв.

— Тэд их яарчээ. Юу гэж яваа юм бэ? гэж бяцхан хунтайж хэлэв.

— Галт тэрэгний толгойны хүн өөрөө хайхардаггүй юм гэж зам зохицуулагч хэллээ. Нөгөө талаар хоёр дахь гэрэлтсэн хурдан галт тэрэг өнгөрөв.

— Тэд эргээд ирж байгаа юм уу? гэж бяцхан хунтайж асуулаа...

— Энэ тэд биш ээ. Энэ сольж байгаа юм гэв. Зам зохицуулагч

— Энд байхдаа тэд дургүй байсан юм уу.

— Нэг газар байхдаа хэзээ ч дуртай байдаггүй юм гэж зам зохицуулагч хэлэв.

Гурав дахь гэрэлтсэн хурдан галт тэрэг нүжигнэн өнгөрөв.

— Эхний аялагчдыг дагаж яваа юм уу? гэж бяцхан хунтайж асуув.

— Тэд ер дагадаггүй юм гэв, зам зохицуулагч. Тэд тэр дотроо унтаж, эвшээж байдаг л даа. Хүүхдүүд л цонхны шилэнд хамраа нааж явдаг юм. Зөвхөн хүүхдүүд л тэдний эрж байгааг мэддэг биз. Тэд хүүхэлдэйдээ цаг алдаж байна. Тэдэнд хүүхэлдэй нь их чухал юм байдаг, түүний нь авбал уйлцгаана... гэж, бяцхан хунтайж хэлэв.

— Тэд азтай улс гэж зам зохицуулагч хэлэв.

XXIII

— Сайн байна уу гэж бяцхан хунтайж мэндлэхэд,

— Сайн байна уу гэж худалдаачин хариу мэндлэв. Энэ нь амны цангаа гаргах үрлийн худалдаачин ажээ. Долоо хоногт нэгийг залгичихад юм уух гэж ер боддоггүй гэнэ.

— Яагаад чи үүнийг худалддаг юм бэ? гэж бяцхан хунтайжийн асуухад,

— Энэ, цаг маш их хэмнэдэг юм гэв, худалдаачин. Шинжлэн магадлах мэргэжилтнүүд тооцоо гаргасан. Долоо хоногт тавин гурван минут хэмнэж байна гэсэн.

— Тавин гурван минутад юу хийх юм бэ?

— Юу л хүссэн тэрийгээ л хийнэ...

«Хэрэв би тавин гурван минут зарцуулах байсан бол, усан оргилуур луу л тайвуухан алхана даа» гэж бяцхан хунтайж бодов.

XXIV

Элсэн цөлд эвдрэл тохиолдоод найм дахь хоног дээрээ, усныхаа нөөцийн сүүлчийн дуслыг ууж байхдаа худалдаачны түүхийг сонсож билээ.

— Аа чиний дурсамж ямар сонин юм бэ? гэж би бяцхан хунтайжид хэлэв. Харин би онгоцоо засаж амжаагүй л байна. Уух юм юу ч байхгүй. Усан оргилуур луу тайвуухан алхаж болох сон бол би ч гэсэн баяр хөөртэй явна даа!

— Миний нөхөр үнэг надад хэлэхдээ...

— Бяцхан сайн хүү минь, тэр үнэгэнд огт хамаагүй!

— Яагаад

— Учир нь бид цангаж үхнэ...

Тэр миний сэтгэлийг ойлгосонгүй надад:

— Үхэх ч гэсэн нэг найзтай байдаг чинь сайн хэрэг. Би үнэг гэдэг найзтайдаа сэтгэл хангалуун байдаг...

Тэр бол аюулыг мэдэхгүй гэж би бодов. Тэр хэзээ ч өлссөн ч үгүй. Цангасан ч үгүй Жаахан нартай л бол гүйцээ...

Тэр намайг харж харж байгаад, миний бодож байгаад хариулсан нь:

— Би бас цангаж байна... худаг эрцгээе...

— Би мөрөө хавчин хэмжээ хязгааргүй элсэн цөлд мухар сохроор худаг эрэх гэдэг тэнэг хэрэг гэв. Тэгсэн мөртөө бид бие биеэ дуурайгаад л алхав.

— Бидний чив чимээгүй явсаар байтал, үдшийн бүрий болон, одод уван цуван гялалзсаар. Миний ам цангаж байсан болохоор, сэтгэл төдий л хөдлөхгүй, оддыг мөрөөдлийн зүйл мэтээр харж явлаа. Бяцхан хунтайжийн хэлсэн үг санаанд орон:

— Чи бас цангаж байна гэв үү? гэж би түүнээс асуулаа

Тэр миний асуултад хариулсангүй. Ерийн байдлаар л:

— Ус зүрхэнд бас сайн байж чадах байх аа... гэв.

Би түүний хэлснийг ойлгосонгүй гэхдээ юу ч хэлсэнгүй... Түүнээс асуух хэрэггүй гэж сайн мэдэж байлаа.

Бяцхан хунтайж ядарчихжээ. Тэр суув. Би хажууд нь суулаа. Хэсэг дуугүй байснаа дахин:

Нэгэн цэцгийн ачаар од гоё харагддаг. Тэр цэцгийг хүмүүс хардаггүй л дээ гэв.

— Тэгэлгүй яах вэ гэж би хариулаад, сарны туяанд элсний үелээг харан, дуугүй суулаа.

— Элсэн цөл ч гэсэн сайхан байна даа гэж тэр хэлэв..

Энэ үнэн л дээ. Би элсэн цөлд дандаа дуртай. Элсний гүвээ дээр сууна. Юу ч үл үзэгдэнэ. Юу ч үл сонсогдоно. Тэр үед анир чимээгүйн дунд нэгэн юм туяарна...

— Элсэн цөлийг чимэглэж байгаа зүйл бол хэдэн алхмын цаанах худгийг нууж байна гэж бяцхан хунтайж хэлэв.

Элсэн цөлийн туяарсан нууцын тухай гэнэт юм санаанд орлоо. Намайг бага байхад манайх хуучны нэгэн байшинд сууж байсан. Тэгэхэд булаастай эрдэнийн тухай домог ярьж билээ. Хэзээ ч хүн түүнийг нээгээгүй, магад ч үгүй эрж хайгаагүй ч байж болох юм. Энэ байшиндаа тэр баяртай байдаг санж. Миний сэтгэлийн угт байгаа гэнэн зүйлийг нуусаар...

— Тийм ээ. Элсэн цөлд ч юм уу, одод ч юм уу, орон байранд ч юм уу хамаарах гоё сайхан нь түүний үл үзэгдэхэд л байгаа юм! гэж би бяцхан хунтайжид хэллээ.

— Чамайг миний үнэгтэй адил зөвшөөрч байгаад чинь, би таатай байна гэв.

Бяцхан хунтайжийг унтахаар нь, тэврээд замдаа орлоо. Миний сэтгэл догдолж байлаа. Тэр надад эмзэгхэн эрдэнэ авч яваа юм шиг санагдав. Газар дээр түүнээс өөр эмзэг юм байхгүй шиг бодогдоно. Сарны гэрэлд, түүний цайвар магнай, аниастай нүд салхинд хийсэж байгаа үсийг харахад, эд бүгд нь бүрхүүл юм шиг санагдав. Үл үзэгдэх нь хамгийн чухал...

Инээмсэглэж байгаа дутуу нээгдсэн уруулыг нь харахад бяцхан хунтайж унтаж байгаа нь ч гэсэн цэцэгтээ үнэнч, сарнай нь түүнийг хэдийд ч гэсэн дэнгийн гол шиг дотроос нь туяаруулан байгаа нь сэтгэл догдлуулав... Надад улам л хэврэг шиг боллоо. Дэнлүүг сайн хамгаалах хэрэгтэй. Салхи сэнгэнэхэд л унтраачихна... Ингэж явсаар, өглөө болоход би худаг олж билээ.

Хүмүүс хурдан галт тэргээр явах боловч тэд юу эрж хайж байгаагаа огт мэддэггүй гэж бяцхан хунтайж хэлэв. Тэгээд л дугуйран эргэхээр...

Тэгээд бяцхан хунтайж:

— Энэ ч чухал юм биш... гэв.

Бидний хүрч очсон худаг, Сахарын худгуудтай адилгүй байв. Сахарын худаг бол элсэн дунд ухчихсан ерийн л нүх байдаг сан. Энэ худаг тосгон суурины худагтай адил аж. Гэтэл тэнд нэг ч тосгон суурин байхгүй, би л мөрөөдөж байлаа.

— Хачин юм даа, татуурга, хувин, оосор... бүх юм бэлэн гэж бяцхан хунтайжид хэлэв.

Тэр инээгээд л, уяаг нь авч, татуургыг нь эргүүлэв. Татуурга нь нар салхинд удчихсан салхин хүрд хяхнаж байгаа юм шиг дуу гарч байв.

— Чи сонсооч, энэ худгийг бид сэргээж, тэр дуулж байна... гэж бяцхан хунтайж хэллээ.

Бяцхан хунтайжийг бяр орох юм хийлгэхийг би хүссэнгүй

— Наадах чинь чамд хэцүү, орхичих, би хийе гэж хэлэв.

— Би худгийн ёроолыг нь хүртэл хувингаа аажуухан оруулав. Би түүнийг тэнд баттай байрлуулав. Чихэнд татуургын дуу сонстож, усан дотор нарны дүрс чичгэнэн харагдана.

— Энэ усыг хараад ам бүр цангачихлаа, надад уулгаач... гэв, бяцхан хунтайж.

Би түүний юу эрж байсныг мэдлээ.

Би хувингаа татан, бяцхан хунтайжийн уруулд хүргэв. Тэр нүдээ аньчаад л залгилаад уналаа. Баяр наадам шиг л боллоо. Бусад идэж уух юмнаас энэ ус л аминд орж байлаа. Одот тэнгэрийн доогуурх алхаа, татуургын дуу, миний гарын хүчээр л энэ худгийг олсон юм. Сэтгэлд таатай бэлэг шиг л. Намайг бага байхад, шинэ жилийн будаалгын хөгжим, сүлд модны гэрэл гэгээ, урьхан инээмсэглэл, шинэ жилийн бэлэг авчихсан байх ийм л байдаг сан.

— Танай тэндэх хүмүүс, нэг цэцэрлэгт таван мянган сарнай тарьдаг... тэд юу эрж хайж байдгийг тэд олдоггүй... гэж бяцхан хунтайж хэлэв.

— Тэд нар түүнийг олдоггүй гэж би хариулав...

— Тэд өөрсдийнхөө эрсэн юмыг ганцхан сарнай буюу балгахан уснаас олж чадна даа...

— Тэгэлгүй яах вэ гэж би хэлэв.

— Бяцхан хунтайж дахиад:

— Харин нүд нь сохор юм бол сэтгэлээр нь эрэх хэрэгтэй

Би ууж авсан. Би сайхан амьсгалж байлаа. Элс өдөр болоход бал бурмын өнгөтэй байдаг. Би ч бас бал бурмын өнгөнд дуртай л даа. Яалаа гэж надад муу байх вэ дээ...

— Чи амласандаа хүрэх хэрэгтэй гэж бяцхан хунтайж дөлгөөхөн хэлээд миний дэргэд суулаа.

— Ямар амлалт?

— Чи мэдэж байна уу... миний хонины хошуувч... би цэцэгтээ хариуцлагатай ханддаг шүү!

Би халааснаасаа зургийн нооргуудаа гаргав. Бяцхан хунтайж тэднийг харан хөхөрч хэлсэн нь:

— Чиний заан мод байцаатай жаахан төстэй болж

— Хөөх!

— Заан модондоо би үнэндээ сэтгэл хангалуун байсан шүү!

— Чиний үнэг... түүний чих... эвэртэй жаахан адилхан болж дэндүү урт байна!

Бяцхан хунтайж дахиад л инээв.

— Бяцхан сайн хүү, чи ялгаж чадахгүй байна, би аварга могойг гадна, дотно талаас нь яаж зурахыг огт чадахгүй байгаа юм.

— Өө! тэр болно оо, хүүхдүүд мэддэг юм гэж бяцхан хунтайж хэлэв. Би хошуувч зурлаа. Түүнд өгөхдөө сэтгэл зовон:

— Миний мэдэхгүй төслүүд чамд бий байхаа... гэлээ. Харин тэр хариулсангүй. Надад:

— Чи мэдэж байна уу. Дэлхий дээр буусныг... маргааш ой болно... гэв.

Тэгээд хэсэг чимээгүй байснаа, дахин:

— Эндээс их ойрхон газар би унасан юм. Тэр уйлав.

Дахиад л учир нь ойлгогдохгүй шинэ сорилттой учрав. Тэр үед надад нэг асуух юм бодогдлоо:

— Амьтан хүн оршин суудаг газраас алсын алсад гав ганцаараа чи ингэж зугаалж яваад, найм хоногийн өмнөх өглөө би чамтай танилцсан нь тохиолдлын зүйл бишээ! Чи яг унасан газраа буцаж очсон уу?

Бяцхан хунтайж уйлсаар л байв.

Би зориггүйхэн шиг:

— Ойгоороо ч очиж магадгүй биз?... гэв.

Бяцхан хунтайж дахиад уйллаа. Тэр асуултад огт хариулсангүй. Харин уйлж байгаа нь тийм гэж үү? гэсэн утга мэт

— Аах! би айж байна... гэв.

— Тэгээд надад:

— Одоо чи юмаа хий. Чи онгоц руугаа буцаж очих хэрэгтэй.

Би чамайг энд хүлээ. Маргааш орой ирээрэй... гэж хэллээ.

Гэвч миний санаа амрахгүй байна. Би үнэгийг бодоод байна.

Дасчихсан болохоороо гээд жаахан уйлах гээд ч байх шиг...

XXVI

Худгийн хажууд, хуучин хананы эвдэрхий байлаа. Маргааш орой нь, би ажлаасаа буцаж ирэхдээ, бяцхан хунтайж, тэр хананы дээр хөлөө унжуулаад сууж байгааг харлаа. Түүний ярьж байгааг сонсоход:

— Чи санахгүй байна уу? Яг энд биш шүү! гэж хэлэв.

Өөр дуу түүнд хариулж байгаа бололтой, хэлсэн нь:

— Тийм, тийм! Өдөр нь нэг зөв, газар нь энд биш...

Би хана дагаад алхав. Хүний дуу ч сонстохгүй хүн ч харагдахгүй байлаа. Тэгж байтал бяцхан хунтайж дахиад л:

— Тэгэлгүй яах вэ. Элсэн дундаас миний мөр хаанаас эхэлснийг хараарай. Чи тэнд намайг хүлээ. Өнөө шөнө би тэнд очно.

Би хананаас хорин метр зайтай байсан боловч юу ч олж харахгүй байлаа. Хэсэг зуур чимээгүй байснаа, бяцхан хунтайж дахиад л:

— Чамд сайн хор байна уу? Надад удаан зовоох юм хийхгүй гэдэг чинь үнэн үү? гэж асуув.

Би зогслоо, зүрх түг түг цохилон, юу ч үл ойлгоно.

— Одоо чи яв... би буулаа! гэж хэлэв.

Тэгээд би хананы ёроол уруу харчхаад, үсрэв! Хоромхон зуур хорлодог шар могой бяцхан хунтайжийн зүг хүзүү сунган эргэж билээ. Би гар буугаа гаргах гэж халаасаа тэмтрэн, урагш ухасхийн алхтал, чимээ гаргаж, могой, гожгодсон ус алга болж байгаа юм шиг элсэн дээгүүр алгуурхан гулссаар, төмөрлөгийн зөөлөн дуу гарган хадны хоорондуур шахцалдан орлоо.

Би, хөөрхий бяцхан хунтайжаа авах гэж хана руу очиход, тэр минь цас шиг цагаан болчхож.

— Энэ чинь ямар сонин явдал бэ? Одоо чи могойнуудтай ярьж байна уу!

Би түүний мөнхийн алтан хүзүүний ороолтыг салгалаа. Би шанааг нь усаар шавшин, ус уулгалаа. Юу ч асуухыг би зүрхэлсэнгүй. Тэр намайг харамсалтайгаар харж, хүзүүгээ над уруу эргүүлэв. Түүний зүрх, карабинаар буудчихсан шувуу үхэх гэж байгаа юм шиг цохилж байв. Бяцхан хунтайж надад:

— Чамайг орхичихсон онгоцоо олж авсанд чинь баяртай байна. Чи гэртээ харьж чадна... гэв.

— Чи яаж мэдээв!

Би ажлаа санаандгүй амжуулснаа бяцхан хунтайждаа хэлэх гэж ирсэн!

Тэр миний асуултад хариулсангүй, харин дахиад л:

— Би ч бас адилхан, өнөөдөр гэртээ харина... гэлээ.

Тэгээд уйтгартайгаар:

— Их ч хол... их ч хэцүү гэв.

Ямар нэгэн онцгой зүйл өнгөрч байгааг би мэдэрч байлаа.

Жаахан хүүхэд шиг түүнийг тэвэрч, ёроолгүй юм уруу эгцээрээ гулгахад нь татаж чадахгүй байгаа юм шиг санагдаж байлаа. Алсыг ширтэн, харц нь цаанаа л нэг ноцтой байв.

— Надад чиний хонь бий. Бас хониндоо хайрцагтай. Хошуувч ч бий. Тэр уйтгартайгаар инээмсэглэв.

Би удаан хүлээв. Алгуурхан дулаацаж байгааг мэдрэн:

— Бяцхан сайн хүү минь, чи айгаа юу...

Тэгэлгүй яах вэ, тэр айж! Харин тэр дөлгөөхөн инээн:

— Өнөө орой үүнээс их айна... гэв.

Дахиад л яаж ч болшгүй хүйт оргиод явчихыг би мэдрэв. Хэзээ ч дахиж сонсохгүй энэ инээлт, тэвчиж чадахгүй бодол төрүүлснийг би ухаарлаа. Энэ нь надад элсэн цөлд усан оргилуур байна гэсэн шиг юм.

Бяцхан сайн хүү минь, чиний инээхийг дахиад л сонсмоор...

Гэтэл тэр надад:

— Өнөө шөнө нэг жилийн ой болно. Миний од, өнгөрсөн жил миний унасан яг тэр газрын дээр байх болно.... гэв.

— Бяцхан сайн хүү минь, од, болзоо, могойны тухай муу зөгнөл биз...

— Тэр миний асуултад хариулсангүй, надад:

— Чухал юм харагдахгүй байх нь сайн... гэв.

— Тэгэлгүй яах вэ....

— Шөнө оддыг чи хараарай. Манайх их жижигхэн, хаана байдгийг нь би чамд үзүүлье. Энэ нь дээр шүү дээ. Миний од чамд бусад од шиг л байх болно. Тэгээд чи бүх одыг харах дуртай болно. Тэд чиний найз нөхөд болцгооно. Дараа нь би чамд бэлэг илгээнэ...

Тэр дахиад л инээлээ.

— Пөөх! бяцхан сайн хүү минь, сайн хүү минь би энэ инээдийг чинь сонсох дуртай!

— Яг энэ л миний бэлэг болно...энэ яг бидний цангаж яваад олсон ус шиг л болно...

— Чи юу хэлэх гээ вэ?

— Хүмүүсийн од адилгүй байдаг шүү. Зарим нэг аялагчдад од зам заагч нь болдог. Заримд нь анивчих гэрлийн төдийхөн байдаг. Эрдэмтэн мэргэдэд чухал асуудал болдог. Миний танил олз хайгчид

од маань алт мэт байдаг. Харин тэр одод нам гүм байдаг. Чамд бол хэнд ч байдаггүй од болох болно доо... бяцхан хунтайж хэлэв.

— Чи юу хэлэх гээ вэ?

— Шөнө чамайг оддыг харахад, тэр оддын нэгэн дээр би амьдран, инээж байна, тэгэхэд чамд бүх од инээж баясан байгаа шиг санагдана. Тэгээд чи инээж чаддаг ододтой болно!

Тэр дахиад инээлээ.

— Тэгээд тайтгарна. Хүн дандаа тайтгардаг. Намайг таньдаг болсондоо чи таатай болно. Чи дандаа миний найз байх болно. Чи надтай хамт инээж байхыг хүсэх болно. Баярлаж баясах гэж... хааяа хааяа цонхоо нээнэ чи. Чамайг тэнгэр лүү хараад инээж байгааг чинь, найз нар чинь гайхацгаана. Тэгэхэд нь чи тэдэнд: Тийм ээ, одод дандаа инээдэг юм! гэж хэлнэ. Тэд чамайг солиорч. дээ гэж бодоцгооно. Би чамайг нэг муу тоглоомтой болгосон юм даа.

Тэр дахиад инээлээ.

— Энэ бол, оддын оронд инээж чаддаг жижигхэн хонх чамд өгсөн шиг л болно...

Тэгээд инээлээ. Тэгснээ нэлээн сүртэй болж:

— Энэ шөнө... чи мэдэж байна уу... битгий ир.

— Би чамайг орхихгүй,

Тэр сандарчихжээ.

— Үүнийг би чамд хэлсэн... энэ бас л могойноос болж байгаа юм. Тэр чамайг хатгах ёсгүй. Могойнууд бол муу зантай. Сэтгэлээ хангах гэж хатгадаг юм... Би чамайг орхихгүй.

Харин ямар нэг юм түүнийг тайвшруулав.

Хоёр дахь удаагаа хатгахаар хоргүй байдаг нь үнэн...

— Тэр шөнө түүний явахыг үзсэнгүй. Тэр чимээ аниргүй зугтаачихсан. Намайг яг гүйцэх гэхэд л тэр шийдэмгий шуурхай яваад байв. Тэр надад зөвхөн л:

— Өө! чи тэнд байгаа юм уу гэсэн...

Тэр гараа авлаа. Дахиад л зовон:

— Чи буруутай. Чамд хэцүү болно. Би үхэх гэж байгаа юм шиг болж байгаа нь, үнэндээ тэгэхгүй л дээ...

— Би дуугүй л байлаа.

— Чи ойлгож байна уу. Энэ маш хол. Би биеэ энэ чигээр нь авч явж чадахгүй. Энэ дэндүү хүнд.

Би дуугүй л байлаа.

— Хэрэггүй болсон хуучин хальс шиг болно. Хуучин хальс гунигтай биш л дээ...

Би дуугүй л байлаа.

Тэр жаахан сэтгэлээр унав. Тэр дахиад хүчлэн:

— Сайн юм болно шүү, чи мэдэж байгаа биз. Би ч бас оддыг харна. Бүх од зэвэрсэн татуургатай бидний олсон худаг л болно. Бүх од тэр худгийн ус шиг л юм болно...

Би дуугүй л байлаа.

— Энэ үнэхээр зугаатай юм болно! Чи таван зуун сая хонхтой, би таван зуун сая усан оргилууртай болно...

Тэр ч бас дуугүй болов. Учир нь уйлсан юм.

Ийм л байна. Би ганцаараа алхъя, тавиад өгөөч гэж гуйв.

Тэр айж байсан болохоороо суучихлаа.

Тэгээд тэр:

— Чи мэднэ... миний цэцэг... би түүндээ хариуцлагатай ханддаг шүү! Тэр дэндүү турьхан. Тэр үнэхээр турьхан. Бусдаас хамгаалах өчүүхэн дөрвөн өргөстэй.

— Би суулаа, зогсож байж чадахгүй нь. Бяцхан хунтайж

— За... ингээд гүйцээ... гэв.

Тэр жаахан түгдэрч байснаа бослоо. Нэг алхлаа. Би хөдөлж чадсангүй.

Түүний шагайны дэргэд ганцхан шар цахилгаан бий болов. Тэр хэсэг зуур хөдлөлгүй зогсов. Дуугарсан ч үгүй, ургаа мод унаж байгаа юм шиг тэр намуухан ойчлоо. Элсэн дээр унасан болохоороо дуу чимээ ч гарсангүй.

XXVII

Одоо, тэгэлгүй ч яах вэ дээ, зургаан жил өнгөрч... энэ түүхийг би үүнээс өмнө ер ярьсангүй. Намайг амьд байгааг нөхөд маань мэдэхээрээ их л таатай байцгаана. Би уйтгарлан байгаагаа тэдэнд... Энэ ядаргаа л даа гэлээ...

Би одоо жаахан тайтгарлаа. Өөрөөр хэлбэл... бүр бүрэн биш. Харин би бяцхан хунтайжийг гарагтаа очсон гэж сайн мэдэж байгаа, яагаад вэ гэвэл, өглөө болоход түүний биеийг олсонгүй. Энэ үнэндээ тийм ч хүнд бие биш байсан л даа... Би шөнө оддыг сонсох дуртай. Энэ бол таван зуун сая хонх шиг л...

Нэгэн онцгой зүйл ингэж болж өнгөрч билээ. Бяцхан хунтайжид зурж өгсөн хошуувчийнхаа сурыг нэмэхээ мартчихжээ. Хошуувч маань хонинд огт тогтохгүй. Би: Гараг дээр юу болж байна? Магадгүй, цэцгийг хонь идсэн байж ч... гэж бодлоо.

Тэр дороо би: Яагаад ч үгүй! Бяцхан хунтайж шөнө бүр цэцгээ шилэн бүрхүүлийн доор тавьдаг, тэр хонио сайн хардаг... гэж бодов. Тэгээд ч би аз жаргалтай байна. Бүх од дөлгөөхөн инээж байна.

Тэр дороо би: Нэг буюу хэдэн удаа ч мартагнасан, одоо гүйцээ! Тэр шилэн бүрхүүлээ нэг орой мартчихаж, эсвэл шөнө хонь чимээгүй гараад явчхаж... гэж бодов. Тэгэхэд хонхнууд уй гашуугаар солигдоно...

Энэ маш нууц юм. Хаана ч юм бэ бүү мэд, бидний танихгүй нэгэн хонь, сарнай цэцгийг идсэн нь үнэн үү, үгүй юү... хэрэв над шиг, та нар ч гэсэн бяцхан хунтайжийг хайрладаг бол орчлон дээрх бүх юм өөрчлөгдөх сөн.

Тэнгэрийг хараарай. Та нар асууцгаа: Хонь цэцгийг идсэн үү, үгүй юү? Бүгд өөрчлөгдсөнийг харцгаана...

Энэ их чухал юм гэдгийг нэг ч том хүн хэзээ ч ойлгохгүй дээ?

* * *

Энэ бол надад ертөнцийн хамгийн сайхан, хамгийн уйтгартай байгалийн үзэсгэлэн байсан юм. Энэ байгалийн үзэсгэлэн өмнөх хуудсан дээрхтэй адил бөгөөд түүнийг та нарт сайн үзүүлэх гэж дахиад зурлаа. Бяцхан хунтайж газар дээр энд ирж, эндээс алга болсон юм.

Хэзээ нэгэн цагт Африкийн элсэн цөлд та нар аялахад баттай танихын тулд, энэ байгалийн үзэсгэлэнг сайн хараарай. Та нар

түүгээр өнгөрөхдөө битгий яараарай, одны яг доор жаахан хүлээхийг наманчлан гуйя! Хэрэв та нар дээр нэг хүүхэд ирээд инээвэл, алтан шар үстэй байвал, юм асуухад хариулахгүй байвал тэр мөн гэж таагаарай. За сайн нөхөд минь! Уйтгар гунигт дарагдуулан намайг битгий орхиорой: тэр эргэж ирсэн байна гээд надад хурдан бичээрэй.



ӨГЛӨГИЙН ЭЗНИЙ СОНОРТ

Манай номын санд байгаа бүх номыг та хүссэн үедээ ҮНЭ ТӨЛБӨРгүй авч уншиж болно.

Аливаа ажлыг хийхэд зардал гардаг шиг уг номын санг бүтээхэд багагүй зардал гарч байгаа.

Та улам олон ном ингэж унших хүсэлтэй бол бидний ажлыг дэмжин манай номын санд НОМоор болон МӨНГӨөр хандив өргөж болно.

Таны хандивласан мөнгө:

- хэвлэгдсэн номыг цахим хэлбэрт оруулах,
- цахимд оруулсан номыг ариутган шүүх,
- цахим технологийн тоног төхөөрөмж авах,
- цахим номын санг өргөжүүлэх,
- цахим номын сангийн чиглэлээр судалгаа хийж, сурч байгаа оюутан судлаачийг дэмжихэд зарцуулагдана.

Хандив өргөх данс


"Хаан банк"

5027 8982 35 (төгрөг) ЦОГТ ОХИН ТЭНГЭР САН

5027 9685 00 (доллар) Tsogt okhin Tenger san

[Орау-гээр бол \(линк\)](#)

Уг номыг “[Болор дуран](#)” шалгуураар шүүсэн болно.
Программтай танилцах бол сурталчилгаа дээр товшиж холбоос руу
орно уу.



1972 оны хэвлэлийн Хэвлэн нийтлэлийн мэдээлэл :

АНТУАН ДЕ СЕНТ-ЭКЗЮПЕРИ

БЯЦХАН ХУН ТАЙЖ

БНМАУ

АРДЫН БОЛОВСРОЛЫН ЯАМНЫ ХЭВЛЭЛ

УЛААНБААТАР

1972

Antoine De Saint-Exupery

LE PETIT PRINCE

Орчуулсан Ц. Сүхбаатар

Редактор Ж. Намсрай

Зургийг З. Нямжав хуулбарлав.

Зургийн редактор Ц. Энэбиш.

Техник редактор Б. Даилэгцэг

Хянагч Б. Цэдэндорж, Ө. Шаравдорж

Хэв. газ. №153/71.

Зах. №286

Өрөлтөд 1971. 10—14

Хэвлэлтэд 1972. 1—20.

Хэвлэлийн хуудас 4, 25 хэвлэлийн нэгж хуудас 4, 84

тооцооны хуудас 2, 35

цаас 70X901/16

Хэвлэсэн тоо 6500

БНМАУ Ардын Боловсролын Яам.

Улаанбаатар,

Октябрын 13

Д. Сүхбаатарын нэрэмжит Хэвлэлийн комбинатад хэвлэв.

Улаанбаатар, Д. Сүхбаатарын талбай, 2.

Заметки

[←1]

Бриж гэдэг хөзрөөр тоглох нэг зүйл тоглоом

[←2]

Гольф гэдэг бөмбөг нүхэнд цохиж оруулан оноогоор хожих
тоглоом